

四庫全書薈要

• 乾隆御覽本

經部

春秋穀梁注疏卷十

起文公元年盡八年

晉范甯集解 唐陸德明音義 楊士勛疏

文公疏

魯世家文公名興僖公之子以襄王二十六年即位諡法慈惠愛民曰文

元年春王正月公即位

傳繼正即位正也注繼正謂繼正卒也隱去即位以

見讓桓書即位示安忍莊閔僖不言即位皆繼弑音

義

去起呂反見賢徧反

二月癸亥日有食之

天王使叔服來會葬注諸侯喪天子使大夫會葬禮也

傳例曰天子大夫稱字蓋未受采邑故不稱氏字者貴

稱故可獨達也音義

貴稱尺證反

疏

釋曰范云傳例者非正例推以知之定十四年

傳曰天子之大夫不名隱七年凡伯來聘傳曰凡伯者何也天子之大夫也又九年南季來聘傳曰南氏姓也季字也是天子之大夫稱字據傳文可知故亦得云傳例也

傳葬曰會注言會明非一人之辭其志重天子之禮

也疏

釋曰五年毛伯來會葬會葬之禮於鄆上此叔服來會葬云其志重天子之禮也者舊解以為

叔服在葬前至先即魯國然後赴葬所毛伯以喪服發後始來先之竟上然後至魯國故傳釋有異辭也或當此釋書之所由故云重天子之禮也彼解會葬之處故云於鄆上二者互言之未必由先後至理亦通也

夏四月丁巳葬我君僖公

傳薨稱公舉上也葬我君接上下也僖公葬而後舉

諡諡所以成德也於卒事乎加之矣疏

釋曰重發傳者桓不以禮

終僖則好卒二者既異故傳詳之

天王使毛伯來錫公命注毛采邑伯字也天子上大夫

也音義

錫星歷反采音菜邑本又作地

傳禮有受命無來錫命錫命非正也疏

釋曰重發傳者桓則堯後

見錫此則即位見錫嫌其得正故傳發之

晉侯伐衛

叔孫得臣如京師

衛人伐晉

秋公孫教會晉侯于戚注禮卿不得會公侯春秋尊魯

內卿大夫可以會外諸侯音義

戚倉反疏注釋曰內卿大夫可會外諸侯

者下二年傳文不於此發例者伯者至尊大夫不可以  
會但春秋內魯故無識文以失禮深傳不可云得會至  
於二年垂歛之會則是凡常諸侯禮雖不達  
人情通許故發內大夫可以會外諸侯之例

冬十月丁未楚世子商臣弑其君髡注鄭嗣曰商臣繆

王也髡文王之子成王也不言其父而言其君者君之

於世子有父之親有君之尊言世子所以明其親也言

其君所以明其尊也商臣於尊親盡矣音義

髡苦門反

傳日髡之卒所以謹商臣之弑也夷狄不言正不正

注徐乾曰中國君卒正者例日篡立不正者不日夷

狄君卒皆畧而不日所以殊夷夏也今書日謹識商

臣之大逆爾不以明髡正與不正音義

纂初患反夏戶雅反識如

字又申

疏

釋曰傳言此者以夷狄之弑有日與不日嫌同中國故分明別之

公孫敖如齊

二年春王二月甲子晉侯及秦師戰于彭衙注彭衙秦

地音義

衙音牙

秦師敗績

丁丑作僖公主

傳作為也為僖公主也注為僖公廟作主也主蓋神

之所馮依其狀正方穿中央達四方天子長尺二寸

諸侯長一尺音義

為僖公廟于偽反馮皮冰反長尺直亮反又如字下同

立主

喪主於虞注禮平旦而葬日中反而祭謂之曰虞其

主用桑吉主於練注期而小祥其主用栗作僖公主

譏其後也注僖公薨至此已十五月作主壞廟有時

日於練焉壞廟壞廟之道易檐可也改塗可也注禮

親過高祖則毀其廟以次而遷將納新神故示有所

加音義

壞音怪下同檐以占反

疏

釋曰僖二十年新作南門傳曰作為也有加其度也彼傳



意言作所以為譏則此作亦譏可知故下傳文作傳  
公主譏其後也案莊公之喪已二十二月仍譏其為  
吉禘今方練而作主猶是凶服而曰吉主者三年之  
喪至二十五月猶未合全吉故公子遂有納幣之譏  
莊公喪制未二十五月而禘祭故譏其為吉此言吉  
者比之虞主故為吉也此雖為練作之主終入廟以  
辨昭穆故傳以吉言之然作主在十三月壞廟在三  
年喪終而傳連言之者此主終入廟入廟即易檐以  
事相繼故連言之非謂作主壞廟同時也或以為練  
而作主之時則易檐改塗故此傳云於練壞廟於傳  
文雖順舊說不然故不從之直記異聞耳虞信引衛  
次仲云宗廟主皆用栗右主八寸左主八寸廣厚三  
寸若祭訖則內於西壁陷中去地一尺六寸右主謂  
父也左主謂母也何休徐邈並與范注同云天子尺  
二寸諸侯一尺狀正方穿中央達四方是與衛氏異  
也其藏之也白虎通亦云藏之西壁則納之西壁中

或如衛說去地高下則無文以明之何休又云謂之虞者親喪已入壙皇皇無所見求而虞事之虞猶安也虞主用喪者桑猶喪也取其名與其虞猶所以副孝子之心練主用栗者謂既埋虞主於兩階之間易用栗木為主取其戰栗故用栗木為主又引士虞記曰桑主不文吉主皆刻而諡之蓋為禘時別昭穆也徐邈注穀梁盡與之同范亦當不異也

三月乙巳及晉處父盟注晉大夫陽處父疏

注釋曰經不言陽注

知以下有晉殺其大夫陽處父故也

傳不言公處父仇也為公諱也注諱公與大夫盟去

處父氏公親如晉使若與其君盟如經言祁儀父矣

不書地者公在晉也莊二十二年秋七月丙申及齊

高溪盟于防不去高溪氏者公不親如齊不與其君

盟於此差降音義

統苦良反為公于偽反去處父起呂反下同溪音兮差初讀反又初

佳何以知其與公盟以其日也何以不言公之如晉

所恥也出不書反不致也疏

釋曰傳決不言公者據隱公八年九月辛卯公

及莒人盟于邾來言公也彼傳云可言公及人不可

言公及大夫故此沒公彼存公也莊二十二年及齊

高溪盟于防傳曰不言公高溪氏也彼已有傳此又

重發者高溪存氏今處父去族嫌異故重發之傳不

於高溪發日以明公存者二者理同此又須辨公不

言如晉意也故就此一發之後注云書日則公盟也

是亦意同之事也傳又云出不書反不致也者以致者必有出出者不必致今出既不書故反亦不致也

夏六月公孫敖會宋公陳侯鄭伯晉士穀盟于垂飲注

垂飲鄭地音義

穀戶木反本又作穀九年同飲如字左氏作垂隴

傳內大夫可以會外諸侯

自十有二月不雨至于秋七月注建午之月猶未為災

傳歷時而言不雨文不憂雨也注僖公憂民歷一時

輒書不雨今文公歷四時乃書是不勤雨也疏

釋曰傳發

之者以僖公憂民之情急故備書之今文公繼父之業無志於民故畧書之以二者既異故傳分而別之

莊三十一年冬不雨不發傳者以一時不雨輕故也下十年十三年意亦與此同故省文不發之不

憂雨者無志乎民也注無恤民志

八月丁卯大事于大廟躋僖公注大事禘也時三年之

喪未終而吉祭於大廟則其譏自明音義

大廟音泰注及傳大祖同

躋于兮反升也禘

戶

疏注釋曰舊解范云其譏自明者

夾反下及注皆同

疏

謂吉禘於莊公書吉此大事于

大廟不書吉者以同未滿三年前已書吉則此亦同譏

故云其譏自明此解取杜預之意也然杜云其譏已明

故得以吉禘並之范云其譏自明焉知遠比吉禘蓋范

意以喪制未終不待譏責其惡足顯故云自明也禘禘

之禮俱在廟序昭穆所以為制異者公羊傳稱五年再

殷祭何休云謂三年禘五年禘禘所以異於禘者禘則

功臣皆祭也。禘則合食於太祖而已。是何休意。禘則三年禘則五年也。范於閏二年注同杜預。以禘為三年之祭。必不得與何休同也。公羊云五年再殷祭。禘既三年蓋禘則五年也。若然。禘在五年而云三年之喪未終者。據時三年未終而為禘祭。故以三年言之。不謂禘祭亦在三年也。或以為禘禘同三年。但禘在夏。禘在秋。直時異耳。於范注不妨。但與公羊五年再殷祭違也。何休又云天子特禘特禘。諸侯禘則不禘。禘則不嘗。大夫有賜於君。然後禘。其高祖然。諸侯禘則不禘。或以何說云大夫有禘。恐其不然。公羊亦以此大事于大廟為禘祭。杜解左氏以大事為禘與穀梁異。

傳大事者何。大是事也。著禘嘗注禘合也。嘗秋祭禘祭者毀廟之主。陳于太祖。未毀廟之主皆升合祭于

大祖注祫祭者皆合祭諸廟已毀未毀者之主於大

祖廟中以昭穆為次序父為昭子為穆昭南鄉穆北

鄉孫從王父坐也祭畢則復還其廟音義昭音韶下及傳同鄉

音向下同躋升也先親而後祖也逆祀也注舊說僖公閔

公庶兄故文公升僖公之主於閔公之上耳僖公雖

長已為臣矣閔公雖小已為君矣臣不可以先君猶

子不可以先父故以昭穆父祖為喻甯曰即之於傳

則無以知其然若引左氏以釋此傳則義雖有似而

於文不辨高宗殷之賢主猶祭豐于禰以致雉雌之

變然後率脩常禮文公慎倒祖考固不足多怪矣親

謂僖祖謂莊音義

長丁丈反先悉薦反下同禰乃禮反雉古豆反雉鳴也慎丁田反倒

丁老反

逆祀則是無昭穆也無昭穆則是無祖也無祖

則無天也故曰文無天無天者是無天而行也注祖

人之始也人之所仰天也君子不以親親害尊尊此

春秋之義也注尊卑有序不可亂也疏

釋曰大是事也者祫是祭

之大者故云大是事也著祫嘗者謂以大事言之著明是祫嘗之祭也嘗連言者祫必在秋故連嘗言之



然周之八月夏之六月而云著祫嘗者蓋月却節前  
已得立秋之節故也先親而後祖親謂僖公祖謂閔  
公也僖繼閔而立猶子之繼父故傳以昭穆祖父為  
喻此於傳文不失而范氏謂莊公為祖其理非也何  
者若范云文公僖倒祖考則是僖在於莊上謂之夷  
狄猶自不然況乎有道之邦豈其若是明范說非也  
則無天也謂天道先尊而後親今亂其上下不仰法  
天也此春秋之義也者以嫌疑之間須取聖證故也

# 冬晉人宋人陳人鄭人伐秦

公子遂如齊納幣注喪制未畢而納幣書非禮

三年春王正月叔孫得臣會晉人宋人陳人衛人鄭人

伐沈沈潰注沈國也潰之為言上下不相得音義

沈音潰

戶內反

夏五月王子虎卒

傳叔服也此不卒者也注外大夫不書卒何以卒之

以其來會葬我卒之也注會葬在元年疏

釋曰重發之者尹氏

則以為魯主此為會葬事異故重發之

或曰以其嘗執重以守也注僖

二十四年天王出居于鄭叔服執重任以守國音義

守手又反

秦人伐晉

秋楚人圍江

雨蝻于宋

傳外災不志此何以志也曰災甚也其甚奈何茅茨

盡矣注茅茨猶盡則嘉穀可知茨蒺藜音義

雨于付反下同

蝻音終茨在疏

釋曰外災不志重發之者志災或為思反茅草也王者之後或為甚而錄之故不得一

例施之

著於上見於下謂之雨音義

見賢疏

釋曰徐邈云禾稼既

盡又食屋之茅茨今范云茨蒺藜則與徐異也公羊與考異郵皆云蝻死而墜於地故何休云蝻猶衆也死而墜者象宋羣臣相殘害也云云上下異之云爾今穀梁直云茅茨盡矣著於上見於下謂之雨與識

違是為短鄭玄云穀梁意亦以宋德薄後將有禍故  
蝥飛在上陸地而死言茅茨盡者著甚之驗於識何  
錯之有乎是鄭意以雨蝥  
於宋亦為將禍之應也

冬公如晉

十有二月己巳公及晉侯盟

晉陽處父帥師伐楚救江

傳此伐楚其言救江何也江遠楚近伐楚所以救江  
也注時楚人圍江晉師伐楚楚國有難則江圍自解

音義

難乃旦反解音  
蟹又古買反

四年春公至自晉

夏逆婦姜于齊

傳其曰婦姜為其禮成乎齊也注婦禮成于齊故在

齊便稱婦音義

為于偽反

其逆者誰也親逆而稱婦或者

公與何其速婦之也注鄭嗣曰皆問者之辭問曰以

使大夫逆例稱女而今稱婦為是公親逆與怪稱婦

速故反覆推之音義

與音餘注同  
覆芳服反

曰公也其不言公

何也注據莊二十四年公如齊逆女言公非成禮於

齊也注非責曰婦有姑之辭也其不言氏何也貶之也何為貶之也夫人與有貶也注邵曰夫人能以禮

自防則夫婦之禮不成於齊故譏公而夫人與焉音

義

與音豫注同貶彼檢反

疏

釋曰宣元年已有傳今復特發之者彼書夫人此直云婦姜嫌文異

也故彼此明之以彼稱夫人又書至此不然者公羊傳曰其謂之逆婦姜于齊何娶於大夫者畧之也徐邈亦以為不書至不稱夫人下娶賤畧之若以諸侯下娶大夫便為畧賤則大夫亦不得上娶諸侯且天子得下婚諸侯何為諸侯不得下娶大夫是公羊之言不可以解此也蓋不稱夫人不言至者以其婦禮成於齊故異於餘稱傳云夫人與有貶也者解不稱氏之意非釋不稱夫人也

狄侵齊

秋楚人滅江

晉侯伐秦

衛侯使甯俞來聘

音義俞羊朱反

冬十有一月壬寅夫人風氏薨注僖公母風氏

五年春王正月王使榮叔歸舍且賜注舍口實也禮記

曰飯用米貝弗忍虛也諸侯舍用玉榮叔天子之上大

夫也榮采地叔字音義

舍戶暗反釋舊作哈疏注釋曰賜芳鳳反飯扶晚反正飯用米

貝不忍虛也禮記禮弓文  
諸侯舍用玉禮緯文也

傳舍一事也贈一事也兼歸之非正也注禮舍贈襚

各異人音義

襚音遂

疏

注釋曰知各異人者雜記稱諸侯之喪有贈者有舍者有襚者

又此傳云兼歸之非正也明天子於諸侯舍襚常各異使也

其曰且志兼也其不

言來不周事之用也注何休曰四年夫人風氏薨九

年秦人來歸僖公成風之襚最晚矣何以言來鄭君

釋之曰秦自敗于穀之後與晉為仇兵無休時乃加

免繆公之喪而來君子原情不責晚用或作辭音義



殺戶交反 賜以早注乘馬曰賜乘馬所以助葬成風未葬

故書早音義

乘繩證反下同

而舍已晚注已殯故言晚國有

遠近皆令及事理不通也禮雜記曰舍者執璧將命

曰寡君使某舍相者入告出曰孤某須矣舍者入升

堂致命子拜稽顙舍者坐委於殯東南有葦席既葬

蒲席降出反位明君之於臣有舍賜之義所以助喪

盡恩舍不必用示有其禮音義

令力呈反相息亮反稽音啟顙息黨反葦

于鬼疏 注釋曰舊解以為傳與雜記違者傳言舍賜反上闕天子之於諸侯及夫人耳雜記所云唯

論諸侯自相施不是天子施於諸侯之事故彼既殯猶致舍此則責其晚也何者諸侯及夫人於天子生有朝覲之好有疾則當告於天子天子遣使問之有喪則致舍無則止矣故未殯以來足以及事今天子歸贈太早歸舍太晚故識之其諸侯相施有疾未必相告比殯以來道遠者容有不至故示其禮而已不責其晚也以事故有殊識亦有異今恐不然何者范云國有遠近皆令及事理不通也則是傳之不通故引記文為證何得云天子與諸侯禮異是舊說妄耳又云明君之於臣云云者證君之於臣有贈舍之義不必皆用也案鄭釋廢疾云天子於二王後之喪舍為先祔次之贈次之餘諸侯舍之贈之小君亦如之於諸侯之臣祔之贈之其諸侯相施如天子於二王之後於卿大夫如天子於諸侯於士如天子於諸侯之臣京師去魯千里王室無事三月乃舍故不言來以譏之是鄭意亦以譏王舍晚也范前注引鄭釋似

將傳為是後注取彼記文則以傳非者范以何休取秦人來歸傳公成風之禮為難非類故上注取鄭釋以排之下注既以傳為非故引雜記之文為證二注並不取鄭君非王舍晚之說益明范云傳為非也

三月辛亥葬我小君成風王使毛伯來會葬疏

釋曰左氏公羊

及徐邈本並云召伯此本作毛伯疑誤也

傳會葬之禮於鄙上注從竟至墓主為送葬來立音義

竟音境為

于偽反

夏公孫敖如晉

秦人入郟音義

郟音若

秋楚人滅六

冬十月甲申許男業卒

六年春葬許僖公

夏季孫行父如陳注行父季友孫疏注釋曰世不季友仲無失失生行

父是也

秋季孫行父如晉

八月乙亥晉侯驩卒音義驩好官反

冬十月公子遂如晉

葬晉襄公

晉殺其大夫陽處父

傳稱國以殺罪累上也襄公已葬其以累上之辭言之何也君漏言也上泄則下闇下闇則上聾且闇且

聾無以相通注臣闇不言君無所聞上下否塞音義

累劣偽反下同或如字漏魯豆反泄息列反又以制反聾魯公反否備鄙反

疏

釋曰徐邈解襄公已

葬謂春秋之例君殺無罪之大夫則是失德不合書葬今襄公書葬則是無罪而以累上之辭言之者以襄公漏泄陽處父之言故也舊解亦云襄公罪輕故不追去葬文今以為傳云襄公已葬者謂卒哭日久

葬在前殺在後是罪累不合及君故  
起累上之問非是釋合書葬以否

夜姑殺者也注

殺處父音義

夜姑左氏  
作射姑

夜姑之殺柰何曰晉將與狄

戰使狐夜姑為將軍趙盾佐之陽處父曰不可古者

君之使臣也使仁者佐賢者不使賢者佐仁者今趙

盾賢夜姑仁其不可乎注邵曰賢者多才也戰主于

攻伐仁者有惻隱之恩不如多才者有權略音義

盾徒

本反攻如字又  
音貢惻初力反

襄公曰諾謂夜姑曰吾始使盾佐女

今女佐盾矣注稱處父語以語之故傳曰漏言也音

義女音汝語  
魚慮反

夜姑曰敬諾襄公死處父主竟上事注

待諸侯會葬在鄙上音義

竟音境

夜姑使人殺之君漏

言也注親殺者夜姑而歸罪於君明由君言而殺之

罪在君也故稱國以殺疏

注釋曰兩下相殺不志乎春秋今雖是夜姑之殺罪

君漏言故稱國以殺

故士造辟而言詭辭而出注辟君也詭辭

而出不以實告人音義

造七報反辟必亦反注同詭九委反

曰用我則

可不用我則無亂其德注此士對君言之辭

晉狐夜姑出奔狄

閏月不告月猶朝于廟注禮天子以十二月朔政班告

于諸侯諸侯受於禰廟孝子尊事先君不敢自專也言

朝者緣生以事死親存朝朝莫夕不敢泄鬼神故事畢

感月始而朝之音義

猶朝直遙反注及下同朝朝上如字下直遙反莫音暮泄息列反

疏注釋曰周禮太史班告朔于邦國鄭玄云天子班朔

於諸侯諸侯藏之祖廟至朔日朝於廟告而受行之

論語云子貢欲去告朔之餼羊是告朔用特羊言廟鄭

云祖廟范言禰廟者以無正文各以意說或祖或禰通

言之耳何休亦云藏於祖廟使大夫南面奉天子命君

北面而受之是亦受政之事也凡告朔之禮因聽視此

月之政故謂之視朔謂之聽朔也其朝廟之禮孝子緣

生以事死因告朔在廟故感月始而亦享祭宗廟故亦



謂之朝享其歲首謂之朝正也據玉藻及祭法之文則天子聽朔於明堂朝享自祖考以下五廟諸侯則聽朔於太廟朝享自皇考以下三廟也公羊傳稱閏月曷為不告朔天無是月也閏月矣何以謂之天無是月非常月也此傳云閏月者附月之餘日也天子不以告朔而喪事不數公羊穀梁皆以為閏月不合告朔左氏傳云不告閏朔棄時政也何以為民主則閏月當告朔與二傳異也案哀五年閏月葬齊景公公羊傳意以為并閏此傳云喪事不數也者閏月不告朔二傳雖同其於喪事數與不數其意又異也范氏別例云書不告朔有三皆所以示譏耳則此文一也公四不視朔二也襄二十九年公在楚三也公既在楚則是不告朔故亦以為一注又云不敢泄鬼神解生則朝朝暮夕死則每月始朝之意也

傳不告月者何也不告朔也不告朔則何為不言朔

也閏月者附月之餘日也積分而成於月者也注一

歲三百六十日餘六日又有小月六積五歲得六十

日而再閏積衆月之餘分以成此月疏

注釋曰古今為歷者皆云

周天有三百六十五度四分度之一日之行天一日  
一夜行一度故謂一度為一日一歲十二月唯有三  
百六十日是餘五日四分日之一也又月一大一小  
則一年之間又有六日并言之則一歲有十二日故  
積五歲得六十日此皆大率而言其實一年不得有  
十二日范不如歷法細計之故云五歲得六十日

天子不以告朔而喪事不數也注閏是叢殘之數非

月之正故吉凶大事皆不用也音義

數所古反或所具反叢徂供反

猶之為言可以已也注郊然後三望告朔然後朝廟

俱言猶義相類也既廢其大而行其細故譏之疏釋

重發傳者前為三望發此是朝廟嫌異故重明之范  
例猶有五等發傳者三傳三十一一年猶三望獨發傳  
者据始也宣三年不發傳者從例也成七年亦不發  
傳者亦為從例可知也此年發傳者朝與三望異也  
宣八年發傳者嫌仲遂有罪得不  
廢禮又繹祭與朝廟禮異故也

七年春公伐邾三月甲戌取須句音義

句其俱反

傳取邑不日此其日何也注據僖二十六年公伐齊

取穀不日不正其再取故謹而日之也注僖二十二

年公已伐邾取須句遇而不改於此為甚故錄日以

志之疏

釋曰哀元年冬仲孫何忌帥師伐邾二年春王二季孫斯云云帥師伐邾取邾東田及

沂西田彼比年伐邾而取兩邑經不書日今僖之與文父子異人特言謹而日之者以文公是不肖之君緩主逆祀取邑致討不得序列於諸侯譏其過而不改故錄日以見惡僖雖伐邾纔始一度又是作頌賢君故與文異也

遂城郕音義

郕音吾

傳遂繼事也注因伐邾之師

夏四月宋公壬臣卒音義

壬或作王

# 宋人殺其大夫

傳稱人以殺誅有罪也疏

釋曰公羊以為三世內娶使若無大夫故不書名左

氏以為無罪故不書名今此傳直云稱人以殺誅有罪也則謂此被殺者為有罪故稱人以殺仍未解不稱名所由案僖二十五年宋殺其大夫傳曰其不稱名姓以其在祖之位尊之也此傳云誅有罪也又經稱宋人則與彼異蓋成公壬臣新卒昭公杵臼未即位國內無君故不稱名氏從未命大夫例故八年鄭釋廢疾亦以此為無君若然兩下相殺春秋不書又不得言其此書殺大夫而云無君者以受命於嗣天子是以言其孤未畢喪故無名氏八年書司馬官也者彼雖實有君而不重爪牙無君人之度故經書司馬傳以無君釋之鄭玄云亦為上下俱失罪臣以權寵逼君故稱人以殺君以非理殺臣故著言司馬不

稱名者以其世在祖之位尊亦與傳  
二十五年宋殺其大夫同是其說也

戊子晉人及秦人戰于令狐注令狐秦地音義

令力反晉

先蔑奔秦

傳不言出在外也輟戰而奔秦以是為逃軍也注輟

止也為將而獨奔故曰逃軍音義

輟丁劣反  
將子匠反

狄侵我西鄙

秋八月公會諸侯晉大夫盟于扈注扈鄭地音義

扈戶音

傳其曰諸侯略之也注晉侯新立公始往會晉侯不

盟大夫受盟既以喪娶又取二邑為諸侯所賤不得

序于會諱使若扈之盟都不可知故略之音義

娶七住反

疏注釋曰舊說使若扈之盟都不可知者謂後十五年亦不序諸侯探解下文故云都也今以為范解

諸侯不序之意魯諱其不與故總言諸侯似若扈之盟諸侯都不可知非是探解下文始稱都也

冬徐伐莒

公孫敖如莒莅盟

傳莅位也其曰位何也前定也其不日前定之盟不

日也疏

釋曰重發傳者以徐伐莒而往莅盟嫌非兩國交盟之例故明之

八年春王正月

夏四月

秋八月戊申天王崩注襄王

冬十月壬午公子遂會晉趙盾盟于衡雍注衡雍鄭地

音義

雍於疏釋曰再稱公子者若下文直言遂恐為繼用反疏事之辭兩名不辨故重言公子以詳之

乙酉公子遂會雒戎盟于暴注鄭地音義

雒音洛本或作伊雒之戎

誤

公孫敖如京師注弔周喪不至而復丙戌奔莒



傳不言所至未如也注若其已行當如公子遂至黃

乃復今不言所至而直言復知其實未如也未如則

未復也未如而曰如不廢君命也注雍曰受命而出

義無私留書如京師以顯命行于下不書所至以表

不去之罪未復而曰復不專君命也注復者事畢之

辭未如故知其未復加畢事之文者言君命無輒專

之道其如非如也其復非復也唯奔莒之為信故謹

而日之也疏

釋曰襄二十三年冬十月乙亥臧孫純出奔邾傳曰其日正臧孫純之出也范

云正其有罪彼云正其有罪則此亦正其有罪兩處  
發傳者此其如非如其復非復臧孫則實奔嫌其意  
異故舉二者以包其餘成十六年冬十月乙亥叔孫  
僑如出奔齊亦同此例故不復發之若然僑如亦是  
有罪書日亦以包之於彼注引徐邈云禮大夫去君  
掃其宗廟不絕其祀身雖出奔而君遇之不失正故  
詳而日之明有恩義也與此異者書日之義有二種  
之意也一為正罪一為兼君恩知者以閔二年公子  
慶父出奔莒文承九月之下而不書日傳稱慶父不  
復見矣明罪重合誅故去日以見恩絕則書日者有  
恩可知以此推之歸父公子愁不書日之從例可知  
也然歸父有罪非成公逐之者歸父殺嫡立庶宜世  
不長魯人逐之實得其罪但惡成  
公逐父之使耳不言歸父無罪也

各

宋人殺其大夫司馬

傳司馬官也其以官稱無君之辭也注何休曰近上  
七年宋公壬臣卒宋人殺其大夫不言官今此在三  
年中言官義相違鄭君釋之曰七年殺其大夫此實  
無君也今殺其司馬無人君之德耳司馬司城君之  
爪牙守國之臣乃殺其司馬奔其司城無道之甚故  
稱官以見輕慢也傳例稱人以殺殺有罪也此上下  
俱失之音義

見賢  
徧反

宋司城來奔

傳司城官也其以官稱無君之辭也來奔者不言出

舉其接我也疏

釋曰重發傳者嫌奔殺異也來奔不言出發傳于此者以是來奔之始故

發之子哀不發者從此例可知

春秋穀梁注疏卷十

春秋穀梁傳注疏卷十考證

天王使叔服來會葬傳疏然後至魯國○後字監本誤  
作始今改正

公孫敖會晉侯于戚疏至於二年垂斂之會○二年監  
本誤作三年今改正

作僖公主傳疏取其名與其麋猶所以副孝子之心○  
麋猶監本誤作猶今據公羊注疏改正

大事于太廟躋僖公疏禘所以異於祫者禘則功臣皆

祭也○功臣監本誤作公臣今改正臣浩按此即書所云大享于先王爾祖與父從與享之者也

傳躋升也先親而後祖也注親謂僖祖謂莊○臣召南

按范氏說俱平正惟此條為好奇之過遂至無理魯文雖愚何至升僖主於莊公之上乎傳之先親而後祖猶公羊之先禰而後祖耳說公羊者曰僖公以臣繼閔公猶子繼父故閔公于文公亦猶祖也其說至當楊氏直糾范注之失是也又按范所引高宗彤日

於義無當高宗豐禰亦不過祭祀品物之盛有殊於遠祖耳必不於禘祭時升小乙之主於祖乙上也

雨螽于宋傳○

臣召南

按漢書五行志云文公三年秋

雨螽于宋穀梁傳曰上下皆合言甚與傳文不同當是括傳文著於上見於下數句之意耳

又疏禾稼既盡一段○宜在傳尾監本誤刊茅茨盡矣疏後今改正

王使榮叔歸含且贈傳而含已晚○劉敞曰春秋惡歸



之云乎豈曰惡兼之云乎又謂其不周事之用亦非也宰啗豈周事之用者乎

閏月不告月猶朝于廟注禮天子以十二月朔政班告于諸侯諸侯受于禰廟疏鄭云祖廟范言禰廟者以無正文各以意說或祖或禰通言之耳○臣召南按

周禮太史頒告朔於邦國鄭注諸侯藏之祖廟禮記玉藻諸侯皮弁以聽朔於大廟何休注公羊亦云祖廟范氏所以不從何鄭之說而言禰廟者以此傳十

六年四不視朔有明文曰諸侯受乎禰廟也此傳自言禰廟范不得違非范之自出意見也但禰廟實不可通故禮記孔疏曰穀梁傳云諸侯受乎禰廟與禮乖非也

傳天子不以告朔而喪事不數也注皆不用也下○各本皆有不數所右也五字陸氏釋文於此處有數所古反後人誤以為注接寫於下且衍不字又訛古為右訛反為也今改正

公伐邾傳疏哀二年春王二月○監本脫春字今增

公子遂會雒戎于暴疏故重言公子以詳之○臣召南

按穀梁無傳疏所言亦是推測之辭其實兩事皆受君命而出故直敘為兩事耳左氏謂書公子為珍之最為無據遂生平有何善狀而聖經珍之乎

宋人殺其大夫司馬宋司城來奔傳○臣浩按左傳司

馬公子邛也司城蕩意諸也經書其官皆貴之公羊仍執三世內娶之說穀梁則以為無君之辭三傳不

同如此



春秋穀梁傳注疏卷十考證

東漢書  
金華會  
生寶

覆校官編修臣蕭際韶

校對官檢討臣王鍾健

膳錄監生臣劉復善

欽定四庫全書薈要

經部

穀梁注疏卷十二



春秋穀梁注疏卷十一

起文公九年  
盡十八年

晉范甯集解

唐陸德明音義

楊士勛疏

九年春毛伯來求金

傳求車猶可求金甚矣注凱曰求俱不可在喪尤甚

不稱使者天子當喪未君也疏

注釋曰求購亦在喪不言尤甚者在喪有

購無金故求購比求金為輕求車不在喪又可於求購故傳云求車猶可凱云在喪求金尤甚

夫人姜氏如齊注歸寧



二月叔孫得臣如京師

傳京大也師衆也言周必以衆與大言之也疏

釋曰不發

於桓九年者內之於京師始於此故發之季姜非魯女故彼處不發雖略不發傳亦同此可知也

辛丑葬襄王

傳天子志崩不志葬舉天下而葬一人其道不疑也

志葬危不得葬也注不得備禮葬疏

釋曰重發傳者桓王七年始葬

襄王則七月而葬嫌異故重發之也

日之甚矣其不葬之辭也注王室

微弱諸侯無復往會葬音義

復扶又反

疏

注釋曰魯不會葬則無由得書

而云王室微弱諸侯無復往會葬者天子志崩不志葬而又書日是不葬之辭故知諸侯無復往會者也其實魯卿往會始書若不會則不當書也故春秋之世有十二王志前者有九書葬者唯五耳良由王室不赴諸侯不會故也志崩有九者平王桓王惠王襄王匡王定王簡王靈王景王是也書葬有五者桓王襄王匡王簡王景王是也其葬王偕王頃王三者不志崩為不赴故也然則天子不合書葬魯史書之者欲見周室之衰不得備禮而葬因遣使往會則錄之若不遣使則葬不明故不錄也傳稱不志葬者據治平之日正法言之也

## 晉人殺其大夫先都

## 三月夫人姜氏至自齊

傳卑以尊致病文公也注夫人行例不致乃以君禮

致刺公寵之過音義

刺七疏

注釋曰范氏例云夫人行有十二例時此致而

書月者蓋以非禮而致故書月以刺之餘不書月者當條皆有義耳夫人行十二者文姜七如齊再如莒是九也夫人姜氏會齊侯于陽穀十也夫人姜氏會齊侯于卞十一也并數此夫人姜氏是十二也徐邈云卑以尊致者文公娶齊大夫女為妻故初逆姜氏不稱夫人今致以夫人禮與逆自違故疾公也范云夫人行例不致乃以君禮致

刺公寵之過則與徐異也

晉人殺其大夫士穀及箕鄭父音義

箕居其反

傳稱人以殺誅有罪也鄭父累也

楚人伐鄭

公子遂會晉人宋人衛人許人救鄭

夏狄侵齊

秋八月曹伯襄卒

九月癸酉地震

傳震動也地不震者也震故謹而日之也注穀梁說

曰大臣盛將動有所變疏

注釋曰范例云地震五例日故此亦日也何休徐邈

並云由公子遂陞為陽行專政之所致今范引穀梁說曰大臣盛將動有所變則與二說同理亦無妨

冬楚子使荻來聘音義

荻子遙反又子小反  
或作荻左氏作椒

傳楚無大夫注無命卿其曰荻何也以其來我寢之

也疏

釋曰既寢之而書名所以不稱氏者公  
羊傳云許夷狄者不一而足理或然也

秦人來歸僖公成風之襚

傳秦人弗夫人也注言秦人弗以成風為夫人故不

言夫人即外之弗夫人而見正焉注見不以妾為妻

之正音義

見賢  
通反

韓曹共公音義

共音  
恭

十年春王三月辛卯臧孫辰卒

夏秦伐晉

楚殺其大夫宜申注僖四年傳曰楚無大夫而今云殺其大夫者楚本祝融之後季連之胄也而國近南蠻遂漸其俗故棄而夷之今知內附中國亦轉强大故進之

音義

胄直又反國近附近之近

疏

注楚本至胄也釋曰國語與楚世家文也

自正月不雨至于秋七月

傳歷時而言不雨文不閔雨也不閔雨者無志乎民

也

及蘇子盟于女栗注女栗某地蘇子周卿士音義  
汝女音

冬狄侵宋

楚子蔡侯次于厥貉注厥貉某地也音義  
貉亡白反

十有一年春楚子伐麇音義  
麇九倫反

夏叔彭生會晉卻缺于承匡注承匡宋地音義  
缺苦悅反

秋曹伯來朝音義  
朝直還反

公子遂如宋

狄侵齊

冬十月甲午叔孫得臣敗狄于鹹

鹹音義敗必邁反鹹音咸

傳不言帥師而言敗何也注據僖元年公子友帥師

敗莒師于麗獲莒曄稱帥師音義

曄力知反女居反

直敗一

人之辭也一人而曰敗何也以衆焉言之也注言其

力足以敵衆疏

釋曰公子友與莒曄戰唯一人相敵亦是直敗一人彼言帥師此不言者

季子與莒曄並將軍衆而行之雖決勝負以其俱有徒衆故經書帥師今叔孫與魯之衆止敵一人故但

言敗不言帥師也

傳曰長狄也弟兄三人佚宕中國注佚猶



更也音義

佚大結反更也宕本又作害更音庚

瓦石不能害注肌膚堅

強瓦石打撻不能虧損音義

強其丈反撻直隻反

叔孫得臣最

善射者也射其目身橫九畝注廣一步長百步為一

畝九畝五丈四尺音義

射其食亦反下注同疏注釋廣古曠反長直亮反

秋考異鄭云兄弟三人各長百尺別之國欲為君何休云長百尺范云五丈四尺者識緯之書不可悉信

以此傳云身橫九畝故知是五丈四尺也杜預注左氏云三文准約國語仲尼稱焦僥長三尺大者不過

數之十非經正文故范所不信

斷其首而載之眉見於軾注兵車之

軾高三尺三寸音義

斷丁管反見賢通反軾音式

疏

注知者考功記云兵車之

廣六尺有六寸又以其廣之半為之軾崇是軾高從上而下去車版三尺三寸橫施一木名之曰軾也

然則何為不言獲也注據莒弔言獲曰古者不重創不禽二毛故不言獲為內諱也注不重創恤病也不禽二毛敬老也仁者造次必於是顛沛必於是故為內諱也既射其目又斷其首為重創鬢髮白為二毛

音義

重直用反注同創初羊反為疏釋曰或以春秋

內于偽反造七報反沛音貝本自不應書經

何諱之有穀梁以不重創為諱其理非也今知不然者以長狄兄弟更害中國禍害為深得臣能立功於一時而標名於萬代其庸大矣若其不諱何以不書且晉獲潞子尚書於經魯獲長狄棄而不錄詳內略

外之義豈其然哉知內諱之言為得其實也

其之齊者王子成父殺之則

未知其之晉者也疏

釋曰公羊傳云兄弟三人一者之齊一者之魯一者之晉何休

云魯成就周道之封齊晉霸尊周室之後長狄別之三國皆欲為君象周衰禮義廢大人無輔助有夷狄行范雖不從何說理亦無妨之魯者叔孫得臣殺之之齊者王子成父殺之謂其之晉者史傳不記未知殺者姓名是誰也

十有二年春王正月邠伯來奔音義

邠音成

杞伯來朝注僖二十七年稱子今稱伯蓋時王所進音

義

朝直  
逮反

二月庚子子叔姬卒

傳其曰子叔姬貴也公之母姊妹也注同母姊妹疏

釋曰傳稱其曰子叔姬貴之也公之母姊妹也則似稱子以明貴是以錄其卒未必由公之母姊妹上下意棄者上傳云公之母姊妹解其稱子所由明貴則書卒賤乃不錄也下傳云許嫁以卒之也欲見其雖貴非許嫁不書上下二傳足成非棄也許嫁乃書卒者以其即貴之漸故也徐邈云上傳云子叔姬者杞夫人見出故不言杞下傳云許嫁者言是列女非杞叔姬也理亦足通未知范意然否其一傳

曰許嫁以卒之也男子二十而冠冠而列丈夫三十而娶女子十五而許嫁二十而嫁注禮二十而冠冠

而在丈夫之列。譙周曰：國不可以久無儲貳，故天子諸侯十五而冠，十五而娶。娶必先冠，以夫婦之道。王教之本，不可以童子之道治之。禮十五為成童，以次成人。欲人君之早有繼體，故因以為節。書稱成王十五而冠，著在金縢。周禮媒氏曰：令男三十而娶，女二十而嫁。內則云：女子十五而笄。說曰：許嫁也是。故男自二十以及三十，女自十五以及二十，皆得以嫁。娶先是則速，後是則晚。凡人嫁娶或以賢淑，或以方類，豈

但年數而已若必差十年乃為夫婦是廢賢淑方類  
苟比年數而已禮何為然哉則三十而娶二十而嫁  
說嫁娶之限蓋不得復過此耳故舜年三十無室書  
稱曰鰥周禮云女子年二十未有嫁者仲春之月奔  
者不禁奔者不待禮聘因媒請嫁而已矣寧謂禮為  
夫之姊妹服長殤年十九至十六如此男不必三十  
而娶女不必二十而嫁明矣此又士大夫之禮音義

冠江渙反娶七佳反鮪在遼反笄古今反先蘇徧反  
後戶豆反毗至反或如字復扶又反鰥古頑反禮

為于偽反疏

注釋曰先儒多以周禮媒氏三十之男

長丁丈反疏二十之女限以年數故范引譙周以為證下取禮文以為早嫁之驗或以賢淑者若文王之娶太姒是也或以方類者左傳稱鄭世子忽云齊大非吾偶是也此又士大夫之禮者著喪服所言多陳士大夫之禮猶不待二十明諸侯以上早娶理在不疑也案尚書金縢無成王十五而冠故彼鄭注云天于諸侯十二而冠成王此年十五於禮已冠而爵弁者承天變故降服也今鄭周云成王十五而冠著在金縢者先儒鄭玄之徒約大戴禮以為文王崩之明年成王始生文王年十五生武王文王九十七而終則終時武王年八十三矣崩之明年武王年八十四也武王九十三而終則武王崩時成王年十歲可知耳周公攝政必在除喪之後是周公初攝政之時成王年十二金縢稱始欲攝政即羣叔流言周公居東二年罪人斯得束前之年是成王年十四秋始感大

風之變王與大夫盡弁以啟金縢之書是啟金縢時  
成王年十五又書傳云四年建侯衛則周公復居攝  
四年作康誥也又書傳云天子年十八稱孟侯作康  
誥之時成王稱孟侯則成王年十八矣周公居攝四  
年成王年十八自然啟金縢迎周公之時成王十五  
故燕周亦以啟金縢時為成王年十五尚書特云王  
與大夫盡弁明王始冠之年故云十五而冠謂在金  
縢也鄭云天子諸侯十二而冠者約左傳魯襄公之  
年耳更無正文可  
據故范亦不從

## 夏楚人圍巢

## 秋滕子來朝

## 秦伯使術來聘注術秦大夫音義

術音  
述



冬十有二月戊午晉人秦人戰于河曲注河曲晉地

傳不言及秦晉之戰已亟故略之也注亟數也夫戰

必有曲直以一人主之二國戰關數曲直不可得詳

故略之不言晉人及秦人戰音義

亟去  
其反疏釋曰七年  
戰于今狐

十年秦伐晉此年  
又戰河曲是數也

季孫行父帥師城諸及鄆

傳稱帥師言有難也音義

難乃  
旦反疏釋曰凡城之志皆  
識今傳云有難則

似無識者傳本有難不是解識與不識直釋其帥師  
之意耳特此城得時又畏甚爭鄆書雖是識情義通

許故傳以有難釋  
之不言譏之意也

十有三年春王正月

夏五月壬午陳侯朔卒疏

釋曰世本是  
陳共公也

邾子濂蔭卒音義

邾其居反  
蔭直居反

疏

釋曰左傳  
是文公也

自正月不雨至于秋七月

大室屋壞注屋者主於覆蓋明廟不都壞音義

大音泰  
傳皆同

傳大室屋壞者有壞道也譏不脩也大室猶世室也

注世世有是室故言世室疏

釋曰高者有崩道下者  
有壞道既言有壞道而

書之者譏不脩也言魯若繕脩之豈有敗壞之理故  
書以譏不敬也成五年梁山崩傳云高者有崩道山  
有崩道又不可繕脩之物而亦書之者刺人君無德  
而致天災令山崩河壅怪異之大故亦書之然山高  
稱崩屋下言壞而序稱禮壞樂崩釋云通  
言之者以禮樂無高下之殊故知通言之

周公曰大

廟注爾雅曰室有東西廂曰廟伯禽曰大室羣公曰

宮注爾雅曰宮謂之室室謂之宮然則其實一也蓋

尊伯禽而異其名疏

注釋曰此下注所引並爾雅釋宮之言有東西廂者謂有夾室

也傳知周公曰大廟伯禽曰大室羣公曰宮者禮記  
明堂位云季夏六月以禘禮祀周公于大廟哀三年  
桓宮僖宮災是周公稱大廟羣公稱宮此經別言大  
室明是伯禽廟公羊傳為世室言世世不毀世與大

意尔禮宗廟之事君親割注割牲疏  
釋曰徐邈云禮記曰君執鸞刀

而割牲是也然彼據初殺牲之時非是割牲之事徐言非也夫人親春注春築威

敬之至也為社稷之主而先君之廟壞極稱之志不

敬也注極稱言屋壞不復依違其文音義  
復扶又反

冬公如晉

衛侯會公于沓注沓地也音義  
沓徒答反

狄侵衛

十有二月己丑公及晉侯盟還自晉

傳還者事未畢也自晉事畢也疏

釋曰知自晉是事畢者以其與致文

同故知是事畢傳知還者事未畢者以未至國都而鄭伯會公于棗故知是未畢春秋上下書還者有四莊八年秋師還傳曰避也今自晉為事未畢而言嫌不得如彼例故復發傳宣十八年歸父還自晉嫌君臣異故復發事未畢之文襄十九年晉士句帥師侵齊聞齊侯卒乃還嫌外內異故亦復發傳云事未畢也還例有四范別例云三者蓋直據內為三不數外臣故也

鄭伯會公于棗注棗鄭地音義

棗芳匪反

十有四年春王正月公至自晉

邾人伐我南鄙

叔彭生帥師伐邾

夏五月乙亥齊侯潘卒

音義潘浦干反

疏

釋曰世家及世本是齊昭公也

六月公會宋公陳侯衛侯鄭伯許男曹伯晉趙盾癸酉同盟于新城注新城宋地

傳同者有同也同外楚也疏

釋曰春秋書同盟非一傳或有釋尔有不釋就

不釋之內辭又不同所以然者莊公之世二幽之盟于時楚國未彊齊桓初霸直取同尊周室而已故傳云同尊周也及召陵首止之後楚不敢與爭襄大齊桓故不復言同當文公時楚人彊盛而中國畏之今同盟詳心外楚不復直能尊周室而已故傳釋之云同外楚也斷道書同傳云外楚也則清丘尔是外楚

故傳省文也舉斷道以邑上下則蟲牢馬陵蒲之與  
戚柯陵虛打之類亦是省文可知同盟雞澤復發傳  
者楚人轉戚中國外之彌其故更發之則戚盟及毫  
城重丘之等亦其義也平丘又重發外楚之文者平  
丘以下中國微弱外楚之事盡于平丘  
從此以後不復能外故發傳以終之也

秋七月有星孛入于北斗音義

字步  
內反

傳孛之為言猶茀也其曰入北斗斗有環域也注據

孛於大辰及東方皆不言入此言入者明斗有規郭  
入其魁中也劉向曰北斗貴星人君之象也茀星亂

臣之類言邪亂之臣將並弑其君音義

茀李軌扶慎  
反徐邈扶勿

反一音步勿反又音弗  
魁苦回反邪似嗟反

# 公至自會

晉人納捷菑于邾弗克納音義

捷在接反  
菑側其反

傳是卻克也其曰人何也微之也何為微之也長轂

五百乘縣地千里注長轂兵車四馬曰乘一乘甲士

三人步卒七十二人五百乘合三萬七千五百人縣

猶彌漫音義

轂古木反乘繩證反  
下及注同年子忽反

疏釋曰不言敗之  
者以非專惡之

稱故傳言  
微之而已

過宋鄭滕薛夏入千乘之國欲變人之主



注夏猶遠也變人之主謂時邾已立獲且邾小國而

言千乘者大邾克之事音義

夏况盛反

至城下然後知何

知之晚也注征不廟筭正其得失勞師遠涉乃至城

下邾以義拒然後方悟貶之曰人不亦宜乎音義

悟五

反故弗克納未伐而曰弗克何也弗克其義也注非力

不足義不可勝捷菑晉出也獲且齊出也注姊妹之

子曰出獲且正也捷菑不正也注正適音義

適丁歷反

九月甲申公孫敖卒于齊

傳奔大夫不言卒而言卒何也注據閔二年公子慶

父出奔莒後不言卒為受其喪不可不卒也其地於

外也注成十七年公孫嬰齊卒于貍蜃傳曰其地未

踰竟宣八年仲遂卒于垂垂齊地然則地或踰竟或

未踰竟凡大夫卒在常所則不地地者皆非其常所

隨其所在而書其地耳不係於踰竟與不踰竟音義

為于偽反狸力之反  
蜃市軫反竟音境

疏

釋曰此與公孫嬰齊卒于貍蜃傳皆釋之宣十年仲遂卒

于垂而傳不釋者此公孫教卒于齊之國內故傳釋之曰其地於外也明在他國而卒公孫嬰齊卒在魯

竟內故傳釋之曰其地未踰竟明非他國也二者既已發傳委是齊地非是他國都又非魯竟內在兩端之間故不復釋之

齊公子商人弑其君舍音義

殺其音試本又作弑

傳舍未踰年其曰君何也成舍之為君所以重商人之弑也注舍不成君則殺者非弑也商人其不以國氏何也注據隱四年衛州吁弑其君完不言公子不以嫌代嫌也注春秋以正治不正不以亂平亂舍不宜立有不正之嫌商人專權有當國之嫌故不書國

氏明不以嫌相代疏

釋曰左氏以舍是昭公之子夫  
人叔姬所生而范云舍不宜立

有不正之嫌以傳云不以嫌代嫌明知  
舍不正又舍卒不日亦是非正之驗

舍之不日何

也未成為君也疏

釋曰傳例凡弑君書日以明正不  
繫于成君若舍是庶成君亦不合

書日而云未成君者春秋不正見者雖庶亦得書日  
即齊侯小白鄭伯突是也今商人為不欲以嫌代嫌  
故不去公子則舍不正之嫌前已著見不  
正已見例當書日為未成君故不日耳

宋子哀來奔

傳其曰子哀失之也注言失其氏族不知何人疏

釋曰

經言宋子哀傳云失之也者舊解失之者謂其未達  
攝子之意案范注云言失其不知何人則不得云失

其稱子之意蓋失之者謂雖知子哀  
是宋之大夫但不知是何族姓也

冬單伯如齊注單伯魯大夫音義

單音善

齊人執單伯

傳私罪也單伯淫于齊齊人執之

齊人執子叔姬

傳叔姬同罪也疏

釋曰叔姬既與單伯同罪而經文異執者單伯是天子命大夫魯人

遣送叔姬未至而與之淫王則聞于取人之術魯則失于遣使之宜故經不書叔姬歸于齊再舉齊執之文者使若異罪然所以為諱也明年書單伯至自齊亦是諱之之事耳公羊亦以為不言齊人執單伯及子叔姬者內辭也使若異罪然左氏則云單伯天子大夫為魯請叔姬非殺梁意也

十有五年春季孫行父如晉

三月宋司馬華孫來盟注泰曰擅權專國不君其君緣

其不臣因曰無君上司馬司城皆不名而此獨名者以

華孫奉使出盟為好於我故書官以見專錄名以存善

音義

華戶化反使所吏反疏釋曰外大夫來盟書名則好呼報反見賢遍反是常事而云錄名以存善

者華孫擅權專國理合變文今得錄名即是同於常使失常為惡則得常是善猶左氏稱公子鞏如齊道女情先君之好故曰公子亦其類也華孫奉使不稱使者以其專故經書官以表之傳云無君之辭也既無君無臣故不得使也

傳司馬官也以其官稱無君之辭也來盟者何前定

也不言及者以國與之也音義

稱尺證反年未注同

疏

釋曰重發傳者

不稱使嫌異常故也

夏曹伯來朝音義

朝直達反

齊人歸公孫敖之喪

六月辛丑朔日有食之鼓用牲于社疏

莊二十五年傳稱鼓禮也鼓既

是禮所以書之者鼓當於朝今用之於社鼓雖得禮用之失處故書也若然彼亦鼓之於社而云禮者彼對用牲為非禮故云鼓禮也其實用鼓亦非其處若得其處經不當書耳

單伯至自齊

傳大夫執則致致則名此其不名何也注據昭十四年意如至自晉稱名天子之命大夫也

晉卻缺帥師伐蔡戊申入蔡疏

釋曰伐入兩舉者伐而不即入故兩舉之也莊

二十八年伐戰兩舉者初伐其竟內戰在國都故爾兩舉之也

秋齊人侵我西鄙

傳其曰鄙遠之也其遠之何也不以難介我國也注

介猶近也音義

難乃旦反介音界

疏

釋曰重發傳者以莊十九年三國伐我今齊人



獨來嫌異  
故重明之

# 季孫行父如晉

冬十有一月諸侯盟于扈注諸侯皆會而公獨不與故

恥而略之疏

注釋曰舊解公獨不與者謂七年扈之盟公不得與故略言諸侯此與十七年公雖

與會諱前不與故亦略之其意解公獨不與謂七年時也今以為公獨不與正謂此年公在不與故言公會諸侯今此會盟公全不往故直言諸侯盟于扈而已皆所以為諱也

十有二月齊人來歸子叔姬

傳其曰子叔姬貴之也其言來歸何也父母之於子

雖有罪猶欲其免也注凱曰書來歸是見出之辭有

罪之人猶與貴稱書之曰子者蓋父母之恩欲免罪

也疏

釋曰來歸者是彰罪之稱而云父母之於子欲其免也者稱子是尊貴之辭雖云來歸以貴辭

言之非是有罪之稱故云欲其免也

齊侯侵我西鄙遂伐曹入其郛注郛郭音義

郭芳

疏

釋曰

公羊傳云郛者何郭也此不發傳者春秋唯有此事而已非例所及故略之也

十有六年春季孫行父會齊侯于陽穀齊侯弗及盟

傳弗及者內辭也行父失命矣齊得內辭也注行父

出會失辭義無可納故齊侯以正道拒而弗受不盟

由齊故得內辭疏

注釋曰以行父失辭之故為齊侯所非外得其所拒內失其志春秋

惡行父之失命故得內辭也

夏五月公四不視朔

傳天子告朔于諸侯諸侯受乎禰廟禮也注每月天

子以朔政班于諸侯諸侯受而納之禰廟告廟以羊

今公自二月不視朔至於五月是後視朔之禮遂廢

故子貢欲去其羊音義

去起呂反疏注釋曰三朝記云周

下此云班朔者彼據周末全不能班之此時尚或班或不班故下傳云以公為厭政以甚矣范云天子班朔而公不視是也知是二月不視朔至五月者以經書五月公四不視朔若從五月以後數之則公或視或不視何得預言四不視朔知從二月至五月為四也又云是後視朔之禮遂廢而經直云公四不視朔者左氏以為此獨書公四不視朔者以表公實有疾非詐奔也公羊謂此公有疾猶可言無疾則不可言殺梁文雖不明蓋從此一議之惡足見其餘不復議也

公四不視朔公不臣也

以公為厭政以甚矣注天子班朔而公不視是不臣

音義

厭於  
豔反

六月戊辰公子遂及齊侯盟于師丘注師丘齊地音義

師丘左氏作邱  
丘公羊作屏丘

傳復行父之盟也注春齊侯不與行父盟故復使遂

脩之音義

復扶又反又音服復使及下注而復皆同

秋八月辛未夫人姜氏薨注僖公夫人

毀泉臺

傳喪不貳事貳事緩喪也注喪事主哀而復毀泉臺

是以喪為緩以文為多失道矣注緩作主躋僖公四

不視朔毀泉臺之類疏

釋曰春秋為尊親者諱而舉其多失道者仲尼之脩春秋

所以示法有罪皆諱何以見其褒貶故桓公弑逆之  
主罪無遺漏亦其比也至於書經文多委曲則亦是  
諱何者文實逆祀而云躋僖文從後多不視朔直言  
四不視朔而已文稱毀泉臺則似嫌其奢泰是亦臣  
子為尊親諱之義也然取二邑大室屋壞不與扈盟  
亦是失道注不言之者云云之類足以包之也公羊  
以為泉臺者是莊公所築即臺也左氏  
與此傳並不顯言或如公羊之說也 自古為之今  
毀之不如勿處而已矣注若以夫人居之而斃者但  
當莫處

楚人秦人巴人滅庸

冬十有一月宋人弑其君杵臼注泰曰傳稱人者衆辭

衆之所同則君過可知又曰稱國以弑其君君惡甚矣

然則舉國重於書人也音義

杵昌呂反疏注釋曰稱人曰其九反衆辭莊十七

年傳文稱國以弑其君君惡甚矣成十八年傳文

十有七年春晉人衛人陳人鄭人伐宋注衛序陳上蓋主會者降之

夏四月癸亥葬我小君聲姜

齊侯伐我西鄙

六月癸未公及齊侯盟于穀

諸侯會于扈注言諸侯者義與上十五年同音義

范云言諸

侯者義與上十五年同亦諸侯皆會公獨不與而略之疏注釋曰彼為公不會略

秋公至自穀

冬公子遂如齊

十有八年春王二月丁丑公薨于臺下

傳臺下非正也疏

釋曰非正與僖同重發之者僖是下寢此則臺下嫌異故發之

秦伯瑩卒音義

瑩乙耕反

夏五月戊戌齊人弑其君商人



六月癸酉葬我君文公

秋公子遂叔孫得臣如齊

傳使舉上客而不稱介不正其同倫而相介故列而數之也注上客聘主也禮大夫為卿介遂與得臣俱

為卿是以同倫為副使故兩言之明無差降音義所使

吏反注同介音界下同副使也數所主反疏注釋曰聘禮卿出以大夫為上介士為末介是也

冬十月子卒注子赤也諸侯在喪既葬之稱音義

稱尺證反

疏

注釋曰公羊傳稱君薨稱子某既葬稱子踰年稱君今子赤文公既葬而云子卒是既葬之稱也

傳子卒不日故也注故殺也不稱殺諱也

夫人姜氏歸于齊

傳惡宣公也注姜氏子赤之母其子被殺故大歸也

宣公亦文公之子其母敬嬴惡不奉姜氏音義

惡烏路反

注同嬴音盈依公羊應作頃熊

疏

釋曰注并言敬嬴者注意欲明宣公是敬嬴所生是非惡敬嬴也舊

解宣公不使其母奉養姜氏故言之理亦通也

有不待貶絕而罪惡見者注

泰曰直書姜氏之歸則宣公罪惡不貶而自見有待貶絕而惡從之者注齊小白以國氏之類是也姪娣

者不孤子之意也注言其一人有子則共養音義

姪大

結反姊音弟共養並如字一讀上九用反下餘亮反

一人有子三人緩帶注共

望其祿疏

釋曰上文直云姪姊者所以分別尊卑明夫人須腰妾之意下文總言緩帶者欲見

有子則喜樂之情均貴賤之意等今宣公為人君不尊養姜氏非緩帶之謂也緩帶者優游之稱也一

曰就賢也注若並有子則就其賢謂年同也宣公不

奉哀姜非此之謂故惡之疏

注釋曰宣以庶子集立非闕就賢范云宣不能

奉養哀姜則是非賢之事故云非此之謂也

季孫行父如齊

莒弑其君庶其注傳例曰稱國以弑其君君惡甚矣疏  
注釋曰注引傳例者嫌小國無大夫例不稱臣名明弑  
逆事重不從凡常大夫之例也舊解稱國者謂惡於國  
人并虐及卿大夫稱人者謂失心於民庶也此  
乃涉於賈逵之說據十六年范注則似不然

春秋穀梁注疏卷十一

春秋穀梁傳注疏卷十一考證

毛伯來求金○臣召南按三傳皆言來求非禮夫來求

非禮所不必言以天王之喪魯自公孫敖奔莒之後  
更不復遣使至毛伯來求金始遣叔孫得臣如周會  
葬為侯國者當如是乎經意見周與魯並失且見當  
時列國不共貢職

叔孫得臣如京師傳疏不發於桓九年者內之於京師  
始於此故發之○臣召南按內大夫之如京師始見

於僖三十年公子遂再見於文元年叔孫得臣不始  
於此年也

楚殺其大夫宜申注楚無大夫而今云殺其大夫者○

臣浩

按經書楚殺其大夫自僖二十八年得臣始不  
始於此年之殺宜申也

叔彭生會晉卻缺于承匡○叔彭生左氏經作叔仲彭  
生承匡左氏經作承筐

公子遂如宋○監本脫宋字今增

叔孫得臣敗狄于鹹傳古者不重創不禽二毛故不言  
獲為內諱也○臣召南按穀梁之迂未有過於此傳  
者也不重創不禽二毛宗襄所以致敗也魯是時幸  
有得臣善射克奏膚功有何可諱

疏公羊傳云兄弟三人一者之齊一者之魯一者之  
晉何休云以下監本作三國各欲為君象周衰禮義  
廢魯成就周道之國齊晉霸者之後此三國為後欲  
見中國皆為夷狄之行○此數句文義全不可通今



檢公羊注原文補正

子叔姬卒傳疏○乘前之年是成王年十四監本誤作十四年又成王年十八監本誤作十八年又明王始冠之年明字監本誤作則今改正

邾子蘧蒢卒○左氏經作蘧蒢字皆從艸

公及晉侯盟還自晉○左氏經作公還自晉此經無公字

公會宋公陳侯衛侯鄭伯許男曹伯晉趙盾癸酉同盟

于新城○許男監本誤作許伯今改正

晉人納捷菑于邾弗克納傳是卻克也其曰人何也微之也○臣召南按左傳云晉趙盾以諸侯之師八百

乘納捷菑于邾公羊則曰卻缺按此時盾將中軍執國政左氏之言必得其實但卻缺亦為卿並時公羊猶不大失克則缺之子也缺方為卿其子乃並時將兵乎此則穀梁之失也

毀泉臺傳疏至於書經文多委曲則亦是諱○多委曲

監本誤作不委曲今改正

春秋穀梁傳注疏卷十一考證

春秋穀梁注疏卷十二

起宣公元年  
盡十八年

晉范甯集解

唐陸德明音義

唐楊士勛疏

宣公疏

魯世家宣公名倭文公之子子赤庶兄以  
周匡王五年即位謹法善問周達曰宣

元年春王正月公即位

傳繼故而言即位與聞乎故也音義

與音豫下  
注亦同

疏

釋

重發傳者桓公纂成君宣公  
基未踰年君嫌異故發之

公子遂如齊逆女注不譏喪娶者不待貶絕而罪惡自

見桓三年傳曰逆女親者也使大夫非正也音義

見賢  
偏反

疏

注釋曰引彼傳例者嫌識喪娶不責親迎故引傳例以明也

三月遂以夫人婦姜

至自齊

傳其不言氏喪未畢故略之也注夫人不能以禮自

固故與有貶疏

注釋曰婚禮遲速由於夫家陽唱陰和因是其理而責夫人者一禮不備

貞女不行夫人姜氏若其不行公得無喪娶之識夫人無苟從之咎故責之

其曰婦緣姑

言之之辭也遂之挈由上致之也注上謂宣公音義

挈苦疏

釋曰傳重言此者嫌喪娶辭略并明不與陳結反疏人之婦同也遂之挈者謂去氏族而直書名

徐邈以享為舉非也左氏以為遂不稱公子者尊夫  
人也公羊以為遂不言公子者一事而再見從省文  
此傳云由上致之是與二傳異也此注云上謂宣公  
昭公二十四年媾至自晉注云上謂宗廟也者釋有  
二家其一云禮夫人三月始見宗廟遂與僑如之致  
由君而已故知上為宣公成公也媾被執而反理當  
告廟故知上謂宗廟也又一釋二者互文也以相通  
見廟之時君稱臣之名以告宗廟則二者皆當書名  
故此云宣公彼云宗廟亦是昭公告之可知此宣公  
亦是告宗廟明矣媾與意如俱為被執而致傳釋有  
異辭者意如訴公於晉媾則無罪故傳不同也此已  
發傳僑如又發之者此喪娶彼非喪娶嫌異故重明  
之

# 夏季孫行父如齊

晉放其大夫胥甲父于衛

傳放猶屏也注屏除稱國以放放無罪也疏

釋曰范例云

放大夫凡有三晉放胥甲父一昭八年楚放公子招二哀二年蔡人放公孫獵三也此云稱國以放放無罪也則稱蔡人者是放有罪也若然招殺世子偃師則招亦有罪不稱楚人者以上有楚師滅陳之文故不復出楚人又招有罪自明故不待更稱楚人也

公會齊侯于平州注平州齊地離會故不致疏

注釋曰不引傳

例者此宜自應例惡無所嫌疑故也

公子遂如齊

六月齊人取濟西田

傳內不言取言取授之也以是為賂齊也注宣公弑

立賂齊以自輔恥賂之故書齊取疏

注釋曰昭二十五年齊侯取鄆

傳曰取易辭也哀八年齊人取讎及闡傳曰惡內也所以三發傳不同者內不合言取今言取是違例之問宜在於始魯人不得已而賂之取雖是易而我難之故直云授之昭公失國之君忠臣喜公得邑故以易辭言之哀公犯齊陵郛而反喪邑易辭之也傳以明惡內之理未顯故傳特言惡內其實皆是易辭也

秋邾子來朝音義

朝直速反

楚子鄭人侵陳遂侵宋

傳遂繼事也



晉趙盾帥師救陳音義

盾徒本反

傳善救陳也疏

釋曰何嫌非善而言善者陳近楚屬晉嫌救之非善故傳釋之又救之者

為善所以駁鄭之過也

宋公陳侯衛侯曹伯會晉師于棗林伐鄭注棗林鄭地

音義

棗芳尾反又音匪

傳列數諸侯而會晉趙盾大趙盾之事也注大其衛

中國攘夷狄音義

數所主反攘而羊反

其曰師何也注據言會

晉師不言會晉趙盾以其大之也注以諸侯大趙盾

之事故言師師者衆大之辭疏

釋曰襄二年晉師宋師衛甯殖侵鄭注云

不書晉宋之將以慢其伐人之喪彼稱師言惡晉宋此稱師云大之者稱師之義不在一方言師雖同善惡有別所謂春秋不嫌同文此之謂也齊救邢惡不及事楚于滅蔡滅非其罪晉宋伐喪失匆匆之義故皆貶之稱師今趙盾伐鄭以救陳宋故經列數諸侯而殊大之明稱師者以著善也

于棗林地

而後伐鄭疑辭也此其地何則著其美也注泰曰夫

救災恤患其道宜速而乃云會于棗林然後伐鄭狀

似伐鄭有疑須會乃定曰非也欲美趙盾之功故詳

錄其會地疏

釋曰桓十五年公會諸侯于襄伐鄭傳曰地而後伐疑辭也非其疑也此傳既

曰疑辭也又云則著其美也者此文雖與會裏同其理則異何者以其列數諸侯而會趙盾則詳其會地亦善可知也

冬晉趙穿帥師侵崇音義

穿音川

晉人宋人伐鄭

傳伐鄭所以救宋也注時楚鄭侵宋疏

釋曰伐鄭所以救宋經不

言救宋者以上有楚子鄭人侵陳遂侵宋之文今云晉人宋人伐鄭明救宋可知故不言之也知非救陳者以救陳之文已見故楚伐宋宋得出而自救者伐宋者不攻都城故得出師助晉也

二年春王二月壬子宋華元帥師及鄭公子歸生帥師

戰于大棘宋師敗績獲宋華元注大棘宗地音義

華戶化反

傳獲者不與之辭也注華元得衆甚賢故不與鄭獲

之疏

釋曰華元得衆故不與鄭獲之然則晉侯失民亦言獲者晉侯雖失衆諸侯無相獲之道故尔

不與秦獲也徐邈云獲是不與之辭與者當稱得也故定九年得寶玉大弓是也然則弓玉與人不類徐言非也何休云華元繫宗者明恥辱及國案齊國書陳夏徵皆繫國則是史之常辭非有異文也言

盡其衆以救其將也注先言敗績而後言獲知華元

得衆心軍敗而後見獲晉與秦戰于韓未言敗績而

君已獲知晉侯不得衆心明矣音義

盡子忍反將子匠反下注將帥

同以三軍敵華元華元雖獲不病矣注何休曰書獲

皆生獲也如欲不病華元當有變文鄭君釋之曰將

帥見獲師敗可知不當復書師敗績此兩書之者明

宗師懼華元見獲皆竭力以救之無奈不勝敵耳華

元有賢行得衆如是雖師敗身獲適明其美不傷賢

行今兩書敗獲非變文如何音義

帥所類反復扶  
又反行下孟反

秦師伐晉

夏晉人宋人衛人陳人侵鄭

秋九月乙丑晉趙盾弑其君夷臯

傳穿弑也注穿趙盾從父昆弟盾不弑而曰盾弑何

也以罪盾也其以罪盾何也曰靈公朝諸大夫而暴

彈之注暴殘暴音義

朝直遙反彈徒丹反又徒旦反

觀其辟丸也趙

盾入諫不聽出亡至於郊注禮三諫不聽則去待放

於竟三年君賜之環則還賜之玦則往必三年者古

疑獄三年而後斷易曰繼用薇經寘于叢棘三歲不

得凶是也自嫌有罪當誅故三年不敢去音義

辟音避竟

音境珙古穴反社元凱云如環而不  
連斷丁亂反徽許歸反經亡北反  
疏注釋曰三諫不聽則去待

放於竟三年公羊傳文君賜之環則還賜之珙則往  
荀卿書有其事易曰繼用徽經寘于叢棘三歲不得  
凶者易坎卦上六爻辭但易本繼作係陸德明云寘  
置也王弼云除隋之極不可升也嚴法峻整難可犯  
也宜其四執寘于思過之地三歲險道之夷也險終  
乃反故三歲不得自修三歲乃可以求復故曰三歲  
不得凶也馬融云徽經索也陸德明云三糾繩  
曰徽二糾繩曰經劉表云三股為徽兩股為經趙穿

弑公而後反趙盾注招使還史狐書賊曰趙盾弑公

注史國史掌書記事狐其名盾曰天乎天乎予無罪

注告天言已無弑君之罪孰為盾而忍弑其君者乎

注迴已易他誰作盾而當忍弑君者乎音義

孰為盾  
絕句孰

誰也史狐曰子為正卿入諫不聽出亡不遠君弑反不

討賊則志同注志同穿也志同則書重非子而誰注

盾是正卿又賢故言重故書之曰晉趙盾弑其君夷

臯者過在下也注鄭嗣曰成十八年晉弑其君州蒲

傳曰稱國以弑其君君惡甚矣然則稱臣以弑罪在

臣下也趙盾弑其君不言罪而曰過者言非盾親弑

有不討賊之過音義

惡如字又  
鳥路反

曰於盾也見忠臣之



至於許世子止見孝子之至注邵曰盾以亡不出竟

反不討賊受弑君之罪忠不至故也止以病不知嘗

藥受弑父之罪孝不至故也音義

見賢通反或如字下同

疏釋曰

趙盾與許止加弑是同而許君書葬晉靈公不書葬者許止失嘗藥之罪輕故書葬以赦止趙盾不討賊之罪重故不書晉侯葬明盾罪不可原也春秋必加弑於此二人者所以見忠孝之至故也忠孝不至則加惡名欲使忠臣觀之不敢惜力孝子見之所以盡心是將來之遠防也

冬十月乙亥天王崩注匡王也

三年春王正月郊牛之口傷

傳之口緩辭也傷自牛作也注牛自傷口非備災之

道不至也故以緩辭言之疏

釋曰此之為緩辭則成七年不言之為急辭也

舊解范氏別例云凡三十五范既總為例則言之者並是緩辭也傳於執衛侯云言之緩辭也則云其餘不殲尔緩可知耳公喪在外逆之緩也衛侯之弟鱣秦伯之弟鍼等稱之者取其緩之得逃吳收六國言之者取其六國同役而不急於軍事也殺奚齊稱之者緩於成君也考仲子宮言之者隱孫而脩之緩也日食言之者不知之緩也則自餘並緩耳理雖遠延舊說既然不可致詰故今亦從之

改卜牛牛死乃不郊

傳事之變也注牛無故自傷其口易牛改卜復死乃

廢郊禮此事之變異音義

又復扶疏

釋曰公羊傳稱改

引稷牲而卜之其帝牲在於滌宮三月於稷者唯具視其身體無災而已不特養於滌宮又云郊必以其祖配者自內出者無匹不行自外至者無主不止今改卜者取於稷牛則未審傳意如何以后稷配郊必與公羊異也不言免牛而云不郊者乃者亡乎人之牛死不行免牛之禮故直言不郊也

辭也注譏宣公不恭致天變疏

釋曰重脩傳者嫌牛死與卜郊不從異也

猶三望

葬匡王

楚子伐陸渾戎音義

渾戶門反又戶困反

夏楚人侵鄭

秋赤狄侵齊

宋師圍曹

冬十月丙戌鄭伯蘭卒

葬鄭穆公

四年春王正月公及齊侯平莒及邾莒人不肯音義

邾音

談國名也

傳及者內為志焉爾平者成也不肯者可以肯也注

凱曰君子不念舊惡況為大國所和乎疏

釋曰舊解以莒不肯

平公伐莒取向莒人彌復怨鄭鄭之與莒方為怨惡乃是成就亂事故訓之為成注無此意恐非也

公伐莒取向注向莒邑音義

向書亮反

傳伐猶可取向甚矣注以義兵討不平未若不用兵

以義使平者也故曰猶可也疏

注釋曰傳稱伐猶可是非正與辭注云義

兵者據其討不直故云義兵也義兵之道不足故傳云猶可也

莒人辭不受治也注

乘義取邑所以不服伐莒義兵也注討不釋怨取向

非也乘義而為利也音義

為如字又于偽反

秦伯稻卒疏

釋曰世本秦共公也

夏六月乙酉鄭公子歸生弑其君夷

赤狄侵齊

秋公如齊公至自齊

冬楚子伐鄭

五年春公如齊

夏公至自齊

秋九月齊高固來逆子叔姬

傳諸侯之嫁子於大夫主大夫以與之注婚禮主人

設几筵于廟以待迎者諸侯大夫尊卑不敵故使大

夫為之主音義

迎魚敬反

來者接內也不正其接內故不

與夫婦之稱也注來者謂高固高固齊之大夫而今

與君接婚姻之禮故不言逆女音義

稱尺證反

疏

釋曰莒慶已發

傳今重廢之者莒慶小國之大夫高固齊之尊卿而取公之同母姊妹嫌待之禮殊故發傳明其不異也

徐邈云傳言吾子是宣公女也禮亦通爾

叔孫得臣卒疏

釋曰隱元年傳曰大夫不日卒惡也今叔孫得臣不日卒亦惡可知矣何休云

知公子逆執君而匿情不言未審范意亦然以否

# 冬齊高固及子叔姬來

傳及者及吾子叔姬也為使來者不使得歸之意也

注高固受使來聘而與婦俱歸故書及以明非禮莊

二十七年冬杞伯姬來僖二十八年秋杞伯姬來皆

不言所及是使得歸之意音義

受使所吏反

疏

釋曰經既言高固及

子叔姬足自明矣傳何須更言及吾子叔姬也者傳方欲解及為非禮故上張其文也注釋曰桓十八年  
際之會去及為非禮此書及為非禮者公與夫人之行須言及以別尊卑故云及夫人姜氏會齊侯于陽



穀言及禱之會以夫人之仇不言及故知去及為非  
禮今叔姬歸寧當以獨來為文高因奉命宜云來聘  
經總之言來故  
書及為非禮

# 楚人伐鄭

## 六年春晉趙盾衛孫免侵陳

傳此帥師也其不言帥師何也注據元年趙盾帥師  
救陳言帥師也不正其敗前事故不與帥師也注元

年救而今更侵之疏

釋曰傳例將卑師衆曰師將尊  
師少直言將成三年晉卻克衛

孫良夫伐牆咎如彼非是敗前事亦不言帥師此云  
不正其敗前事故不與帥師者凡常書經自依將之

尊卑師之多少之例趙盾元年稱帥師救陳今直書名而已明是惡敗前事故不與帥師也郤克良夫前無帥師之文故知從將尊師少例耳

夏四月

秋八月螽音義

螽音終

冬十月

七年春衛侯使孫良夫來盟

傳來盟前定也不言及者以國與之不言其人亦以

國與之不日前定之盟不日疏

釋曰此重發傳者宋華孫不稱使此則稱

使嫌異故重發之言不日者據成  
三年及荀庚盟有日故發問也

夏公會齊侯伐萊

音義萊音來  
國名

秋公至自伐萊

大旱

冬公會晉侯宋公衛侯鄭伯曹伯于黑壤注黑壤某地

音義

壤人  
丈反

八年春公至自會

夏六月公子遂如齊至黃乃復注蓋有疾而還黃齊地

疏

釋曰以下有卒故知有疾也

傳乃者亡乎人之辭也注鄭嗣曰大夫受命而出雖

死以尸將事今遂以疾而還失禮違命故曰亡乎人

言魯使不得其人也疏

釋曰重發傳者此乃復是事畢之文其實未畢嫌與他例

異故重明之此云乃者亡乎人之辭也定十五年傳以為急辭也者乃有二義故也此魯使不得其人言乃以責之公孫敖亦是失命不言乃者此以疾而反有可責之理故言乃復以譏之敖棄命奔莒元來未去不足可責非乃文

復者事畢也不專公命也注遂

以疾反而加事畢之文者是不使遂專命還

辛巳有事于大廟音義

大音恭

仲遂卒于垂注祭于大廟

之日而知仲遂卒垂齊地疏

注釋曰注言此者解經仲遂之卒繫祭廟之意也仲

遂有罪而亦書日者宣公與遂同罪猶定公不惡意如而書日也或當辛巳自為祭廟不為仲遂也案公子翬當桓世無罪則不去公子仲遂非宜惡人而去公子者翬非桓罪人故生存不去公子之號仲遂於宣雖則無罪死者人之終若不去公子嫌其全無罪狀故去之若然何以不去日者既替其尊號則罪已明故不假去日也傳稱公弟叔仲賢也遂非賢而稱仲者杜預云時君所加何休云稱仲者起嬰齊所氏范雖不注理未必然蓋以遂見疏而去公子經不可單稱遂卒遂於後以仲為氏故稱仲遂卒也然仲遂以罪見疏即見罪惡之臣而譏宣公不廢釋者宣公與遂同心釋祭之時則內舞去籥而為之變所以譏也

傳為若反命而後卒也注先書復後言卒使若遂已  
反命于君而後卒于垂此公子也其曰仲何也疏之  
也注僖十六年傳曰大夫不言公子公孫疏之也何  
為疏之也是不卒者也注遂與宣公共弑子赤不疏  
則無用見其不卒也注若書公子則與正卒者同故  
去公子以見之音義見賢徧反注同去起  
呂反下文及注同則其卒之  
何也注據公子翬不書卒音義韋許  
反以譏乎宣也其  
譏乎宣何也聞大夫之喪則去樂卒事注去籥萬卒

祭事言今不然

壬午猶繹萬入去籥音義

繹音亦爾雅云又祭也籥餘若反管也

傳猶者可以已之辭也繹者祭之旦日之事賓也萬

入去籥注萬舞名籥管也音義

亨許疏釋曰旦日猶文反明日也何休

云繹者繼昨日事但不灌地降神耳天子諸侯曰繹大夫曰賓尸士曰宴尸禮天子以卿為之諸侯則以大夫為之卿大夫以孫為之夏立尸殷坐尸周旅酬六尸唯士宴尸與先儒少異則范意或與何同也果少牢饋食之禮卿大夫當日賓尸天子諸侯明日賓尸者天子諸侯禮大故異日為之卿大夫以下禮小故當日即行其三代之名者案爾雅云夏曰復昨殷曰彤周曰繹是也謂之復昨者復前日之禮也謂之

彤者彤是不純之意也謂之輝者輝陳昨日禮也何  
休又云禮大夫死為廢一時之祭有事于廟而聞之  
者去樂卒事至卒事而聞之者廢輝今魯不以為譏范意當亦然也以其為之變譏之  
也注內舞去籥惡其聲聞此為卿變於常禮是知其  
不可而為之音義為之于偽反注為卿同惡烏路反

戊子夫人熊氏薨注宣公妾母音義

左氏作嬴氏

晉師白狄伐秦

楚人滅舒鄆音義

鄆音了本又作蓼國名

秋七月甲子日有食之既



冬十月己丑葬我小君頃熊注文夫人姜氏大歸于齊

故宣公立已妾母為夫人君以夫人禮卒葬之故主書

者不得以為夫人義與成風同音義

頃熊音傾左氏作敬羸

疏

注釋曰哀姜有罪故僖成其母為夫人今姜氏子殺故身出本自無罪則頃熊成喪不是同例而云與成風同者禮妾子為君其母不得稱夫人以二者俱非正禮故云同耳非謂意盡同也穀梁以成風再貶故曰妾子雖為君其母不得稱夫人則襄公以其母定姒為夫人亦非正明也然成風再貶自外不譏者從一譏故也案文十八年注云宣母敬羸此云

雨不克葬

傳葬既有日不為雨止禮也雨不克葬喪不以制也

注徐邈曰案經文是己丑之日葬喪既出而遇雨若  
未及己丑而却期無為逆書此日葬禮喪事有進無  
退又士喪禮有潦車載蓑笠則人君之張設固兼備  
矣禮先遷柩於廟其明昧爽而引既及葬日之晨則  
祖行遣奠之禮設矣故雖雨猶終事不敢停柩久次

音義

不為于偽反潦音老蓑素禾反笠音立張如字  
又陟亮反柩其又反尸在棺曰柩昧音妹引以

刃反又如字  
遣奠棄戰反疏

解曰舊解案禮庶人懸封葬不為雨  
止明天子諸侯不觸雨而行可知也

傳言不為雨止者謂不得止葬事而更卜遠日喪不  
以制也者謂不得臨雨而制喪事豈有諸侯執紼者

五百人安得觸雨而行哉是徐邈之說理之不通今  
樂傳文云雨不克葬喪不以制也是葬為雨止喪事  
不以禮制也上文云葬既有日不為雨止禮也明為  
雨止則非禮可知安得云傳意葬為雨止乎又且范  
引徐邈之注不言其非則是從徐說笑何為述范義  
而違之哉注釋曰未及己丑而却期者謂雨之與葬  
皆是己丑之日也若未及己丑之日而遇雨其葬期  
有却者何為逆書己丑日葬也士喪禮有潦車載蓑  
笠者毛詩傳云蓑所以備雨笠所以禦暑是也

# 庚寅日中而克葬

傳而緩辭也足乎日之辭也疏

釋曰言緩辭也者此日中克葬足乎日故

云緩也定十五年日下晁乃克葬故云乃急辭也是  
二文相對為緩急故公羊傳云易為或言而或言乃

乃難乎而也是  
二文相對也

城平陽

楚師伐陳

九年春王正月公如齊注有母之喪而行朝會非禮音

義朝直疏注釋曰非禮經無異文者傳例云如往月  
逢反疏危往也此朝書月即是非禮之異文也

公至自齊

夏仲孫蔑如京師

齊侯伐萊

秋取根牟疏

釋曰公羊傳曰根牟者何邾婁之邑也曷為不繫乎邾婁諱亟也謂母喪未期而取

邑故諱不繫邾婁也若言諱不繫邾婁居母之喪縱非邾邑豈容無諱或當如左傳以根牟為國名也

八月滕子卒

九月晉侯宋公衛侯鄭伯曹伯會于扈

晉荀林父帥師伐陳

辛酉晉侯黑臀卒于扈音義

臀徒門反

傳其地於外也其日未踰竟也注外謂國都之外諸

侯卒於路寢則不地傳例曰諸侯正卒則日不正則

不日舊說踰竟亦不日然則諸侯不正而與未踰竟  
無以別之矣案襄七年鄭伯卒于操此年晉侯卒于  
扈文正與襄二十六年許男卒於楚同恐後人謂操  
扈是國故於疑似之際每為發傳曰未踰竟也音義

竟音境別彼列  
反操七報反

疏

注釋曰諸侯之國皆以侵伐會盟  
見經操扈經既無文而疑是國者

周有千八百諸侯今盟會侵伐見春秋者不過數十  
而已操扈傳若不發焉知非國也曲棘不釋者雙名  
也去國遠矣故不假釋邢部部以三言為名故傳釋  
之為國也晉侯黑臀不書葬者舊解以為篡立故也  
今案黑臀既書日卒未必  
篡立蓋魯不會故不書也

冬十月癸酉衛侯鄭卒

宋人圍滕

楚人伐鄭

晉卻缺帥師救鄭

音義 卻去逆反 缺傾雪反

陳殺其大夫泄冶

音義 泄息列反 冶音也

傳稱國以殺其大夫殺無罪也泄冶之無罪如何陳

靈公通于夏徵舒之家公孫寧儀行父亦通其家注

二人陳大夫

音義 夏戶反

或衣其衣或衷其襦注衷者

襦在衣也音義

衣其衣上於既反下如字襦而朱反衣本又作裏音里

以相戲

於朝音義

朝直送反

泄冶聞之入諫曰使國人聞之則猶

可使仁人聞之則不可君愧於泄冶不能用其言而殺之

十年春公如齊公至自齊齊人歸我濟西田

傳公娶齊齊由以為兄弟反之注齊由以婚族故還

魯田爾雅釋親曰婦之黨為婚兄弟音義

娶七住反

不言

來公如齊受之也疏

釋曰据定十年齊人來歸郭疏龜陰之田言來也



夏四月丙辰日有食之注傳例曰言日不言朔食晦日

則此丙辰晦之日也已已在晦日之下五月之上推尋  
義例當是閏月矣文六年傳曰閏月者附月之餘日言  
閏承前月而受其餘日故書閏月之日繫前月之下蓋  
史策常法文有定例閏有常體無嫌不明故不復每月  
發傳哀五年公羊傳曰閏月不書此何以書推此言之  
則春秋固有在閏月而不冠以閏者矣至於閏不告月  
猶朝于廟閏月葬齊景公不正其閏無以言其事故書

見變禮音義

復扶又反下注復以同冠工亂反朝直遙反見賢徧反

疏

注釋曰閏月所在無

常而言有常體者閏是附月之餘文承前月是無體之常不謂所在有常

己巳齊侯元卒

齊崔氏出奔衛

傳氏者舉族而出之之辭也注何休曰氏者譏世卿

也即稱氏為舉族而出尹氏卒寧可復以為舉族死

乎鄭君釋之曰云舉族死是何妖問甚乎舉族而出

之之辭者固譏世卿也崔杼以世卿專權齊人惡其

族令出奔既不欲其身反又不欲國立其宗後故孔  
子順而書之曰崔氏出奔衛若其舉族盡去之爾音

義

杆直呂反  
惡烏路反

公如齊五月公至自齊

癸巳陳夏徵舒弑其君平國

六月宋師伐滕注月者蓋為下齊惠公葬速起音義

于為

偽疏  
注釋曰知非為宋師伐滕歸父如齊者宋師伐滕  
反疏外事也歸父之聘經也諸侯時葬正也月葬故也

今上有齊逐崔氏之文又非五  
月而葬明書月者為葬惠公也

公孫歸父如齊葬齊惠公

晉人宋人衛人曹人伐鄭

秋天王使王季子來聘

傳其曰王季王子也其曰子尊之也注子者人之貴

稱音義

稱尺證反

疏

釋曰傳知稱子是尊之也者此言王季子即是大子之母弟子者人之貴

稱故稱子為尊之也叔服以庶子為大夫故直稱字而不繫王也卒稱王子虎者卒當稱名故繫王言之

聘問也

公孫歸父帥師伐邾取繹音義

繹音亦

大水

季孫行父如齊

冬公孫歸父如齊

齊侯使國佐來聘

饑音義

饑本或作  
飢居疑反

楚子伐鄭

十有一年春王正月

夏楚子陳侯鄭伯盟于夷陵注夷陵齊地音義

左氏作  
辰陵

公孫歸父會齊人伐莒

秋晉侯會狄于欒函注欒函狄地音義

函音咸

傳不言及外狄注所以異之於諸夏音義

夏戶疏釋雅反

哀十三年公會晉侯及吳子于黃池注云及者書尊及卑也是言及所以外吳何得此傳云不言及外狄者黃池之會欲同吳子於諸侯故直云及吳子不云會吳此不言及是外狄故云會狄不云及狄是不言及為外狄也若不外當云晉侯及狄會于欒函然隱三年齊侯鄭伯盟于石門不言及同吳於諸夏而云及吳子者不可全同中國故言及以別尊卑也

冬十月楚人殺陳夏徵舒注變楚子言人者弑君之賊

若曰人人所得殺也其月謹之疏

釋曰經直言楚人知是楚子者下云楚子

入陳明知此為討賊故變楚子言人也其月謹之者不能自討藉楚之力禍害必深故書月為謹之

傳此入而殺也其不言入何也注據入國乃得殺外

徵舒於陳也其外徵舒於陳何也注據徵舒陳大夫

不應外明楚之討有罪也注雍曰經若書楚子入陳

殺夏徵舒者則入者內不受是無以表徵舒之悖逆

楚子之得正音義

悖補對反

丁亥楚子入陳

傳入者內弗受也日入惡入者也何用弗受也不使  
夷狄為中國也注楚子入陳納淫亂之人執國威柄  
制其君臣僨倒上下錯亂邪正是以夷狄為中國音  
義惡烏路反僨丁田反疏釋曰上文美楚子入今又  
本又作顛邪似嗟反疏惡之者前為討微舒討得  
其罪故變文以美之今為納  
二子失其所故日入以惡之

### 納公孫寧儀行父于陳

傳納者內弗受也輔人之不能民而討猶可注雍曰  
輔相鄰國有不能治民者而討其罪人則可而曰猶



可者明鄰國之君無輔相之道音義

相息亮反

疏

釋曰麋信云二

子不繫陳者以其淫亂明絕之也或當上有人陳之文下云于陳故者文耳無義例

入人之國

制人之上下使不得其君臣之道不可注二人與昏

淫當絕而楚強納之是制人之上下音義

強其丈反一音其良

反

十有二年春葬陳靈公注傳例曰失德不葬君弑賊不

討不葬以罪下也日卒時葬正也靈公淫夏姬殺洩冶

臣子不能討賊踰三年然後葬而日卒時葬何邪泰曰

楚已討之矣臣子雖欲討之無所討也故君子即而恕之以申臣子之恩稱國以殺大夫則靈公之惡不嫌不明書葬以表討賊不言靈公無罪也踰三年而後葬則國亂居可知矣非日月小有前却則書時不嫌音義

夏戶

雅疏

注釋曰失德不葬昭十三年傳文君弑賊不討不書葬以罪下也隱十一年傳文日卒時葬正也襄

七年傳文集徵舒之弑靈公在十年五月至此纔二十一月而注云踰三年者諸侯五月而葬今踰五月至三年故曰踰也非日月小有前却者未五月謂之前遇五月謂之却言葬有前却則書月以見危今三年始葬非是小有前却故書時不嫌也

楚子圍鄭

夏六月乙卯晉荀林父帥師及楚子戰于邲注邲鄭地

音義

邲皮疏釋曰公羊傳稱荀林父稱名氏先楚子者必反疏釋曰公羊傳稱荀林父稱名氏先楚子者

子玉乎徐邈云先林父者內晉而外楚是也

晉師敗績

傳績功也功事也日其事敗也疏

釋曰爲解此戰事書日者爲敗之故

也特於此發之者二國兵衆不同小國之戰故特發之徐邈云於此發傳者深閔中國大敗於強楚也今以日爲諸辭理足通也但舊解爲日月之日疑不敢實故皆存耳

秋七月

冬十有二月戊寅楚子滅蕭疏

釋曰書日者徐邈云蕭君有賢德故書日也何

休云責楚滅人國故書日若揮善而從則徐言與傳例合也

晉人宋人衛人曹人同盟于清丘注清丘衛地

宋師伐陳

衛人救陳疏

釋曰不言善者衛宋同盟外楚今反救陳不足可善故傳不釋

十有三年春齊師伐莒

夏楚子伐宋

秋螽

冬晉殺其大夫先穀

義殺戶木反

疏

釋曰此雖無傳於例為殺無罪

也

十有四年春衛殺其大夫孔達

夏五月壬申曹伯壽卒

晉侯伐鄭

秋九月楚子圉宋疏

釋曰徐邈云國例時此國久故書月以惡之也何休亦然范意或當

不異也

葬曹文公

冬公孫歸父會齊侯于穀

十有五年春公孫歸父會楚子于宋

夏五月宋人及楚人平

傳平者成也善其量力而反義也注各自知力不能

相制反共和之義疏

釋曰重發傳者  
兼外內異也

人者衆辭也平

稱衆上下欲之也外平不道以吾人之存焉道之也

注吾人謂大夫歸父

六月癸卯晉師滅赤狄潞氏以潞子嬰兒歸

傳滅國有三術注術猶道也音義

潞音潞嬰一恤反

中國謹

日卑國月夷狄不日注卑國謂附庸之屬襄六年傳

曰中國日卑國月夷狄時此謂三術其曰潞子嬰兒

賢也疏

釋曰中國日者謂衛滅邢之類是也卑國月者謂無駭入極齊侯滅萊之類是也夷狄不

日者楚滅江黃吳滅州來之類是也此不云夷狄時而云不日者方釋潞子嬰兒書日之意故不云夷狄時也夷狄不日宜從下為文勢嬰兒為賢書日後稱名者書日以表其賢書名以見滅國所謂善惡兩舉也

秦人伐晉

王札子殺召伯毛伯

傳王札子者當上之辭也殺召伯毛伯不言其何也

注經解不言殺其大夫音義

札側八反  
召上照反

兩下相殺也

兩下相殺不志乎春秋此其志何也矯王命以殺之

非忿怒相殺也故曰以王命殺也注以王命殺謂言

王札子殺召伯毛伯是知以王命而殺之音義

矯居表反

以王命殺則何志焉為天下主者天也繼天者君也  
君之所存者命也為人臣而侵其君之命而用之是



不臣也為人君而失其命是不君也君不君臣不臣  
此天下所以傾也

秋螽

仲孫蔑會齊高固于無婁注無婁杞邑音義

婁力侯反

初稅畝音義

稅始銳  
反賦也

傳初者始也古者什一注一夫一婦佃田百畝以共

五口父母妻子也又受田一十畝以為公田公田在

內私田在外此一夫一婦為耕百一十畝音義

什一  
音十

十稅一也佃音田藉而不稅注藉此公田而收其入

言不稅民疏

釋曰徐邈曰藉借也謂借民力治公田不稅民之私也觀范之注以藉為賦藉

理亦通從徐之言義無妨也

初稅畝非正也古者三百步為里名

曰井田井田者九百畝公田居一注出除公田八十

畝餘八百二十畝故井田之法八家共一井八百畝

餘二十畝家各二畝半為廬舍音義

廬力反

私田稼不

善則非吏注非責也吏田峻也言吏急民使不得營

私田音義

峻音俊田大夫也

公田稼不善則非民注民勤私

也初稅畝者非公之去公田而履畝十取一也以公

之與民為已悉矣注悉謂盡其力音義起呂反疏

釋曰何休云宣公無恩信於民民不肯盡力治公田故公家履踐案行擇其善畝穀最好者稅取之故曰履畝徐邈以為除去公田之外又稅私田之十一也傳稱以公之與民為已悉矣則徐言是也古者

公田為居注八家共居井竈蔥韭盡取焉注損其廬

舍家作一園以種五菜外種楸桑以備養生送死音

義韭音九疏注釋曰損為減損也五菜者世所謂五

楸音秋夫一婦受田百畝身與父母妻子五口以為一戶公田十畝又廬舍二畝半凡為田一頃一十二畝半也

大家而有九頃故曰井田廬舍在內貴人也公田次之重公也私田在外賤私也若五口之外名曰餘夫餘夫率受田二十五畝半記異聞耳於范氏注亦無所取

冬螽生音義

螽以全反劉歆云此蚍蜉子董仲舒云蝗子字林尹絹反

傳螽非災也其曰螽非稅畝之災也注凡春秋記災未有言生者螽之言緣也緣宣公稅畝故生此災以責之非責也

饑

十有六年春王正月晉人滅赤狄甲氏及留吁注甲氏

留吁赤狄別種晉既滅潞氏今又並盡其餘邑也滅夷

狄時賢嬰兒故滅其餘邑猶月音義

吁許于反種章勇反并必政反又如

字疏

釋曰傳例滅夷狄時嬰兒以賢書日故知餘邑書月亦為賢也甲氏留吁非國而云滅者甲氏留吁

國之大邑而晉盡有之重其事故云滅若晉滅夏陽之類是也留吁言及者蓋小於甲氏也

夏成周宣榭災注成周東周今之洛陽宣榭宣王之榭

爾雅曰室有東西廂曰廟無東西廂有室曰寢無室曰

榭傳例曰國曰災邑曰火音義

榭音謝本或作疏謝災左氏作火

釋曰不言

京師者爾時成周非京師故也公羊傳云宣榭者何宣  
宮之榭也故范注亦以為宣王之廟也無室曰榭爾雅

正文或以爲爾雅無此文唯曰上高曰臺有木謂之榭  
臺上有木卽是屋也楚語曰榭不過講軍實臨觀講武  
必是敵前故云無室曰榭爾雅有之者本或  
誤也又引傳例曰云云者昭九年傳文也

傳周災不志也其曰宣榭何也以樂器之所藏目之

也注移風易俗莫善於樂是故貴其器疏

釋曰徐邈所據本云

周災至注云重王室也今遍檢范本並有不字則不得解與徐同也

秋郊伯姬來歸注爲夫家所遣

冬大有年

傳五穀大熟爲大有年

十有七年春王正月庚子許男錫我卒音義

錫墨歷反

丁未蔡侯申卒

夏葬許昭公

葬蔡文公

六月癸卯日有食之

己未公會晉侯衛侯曹伯邾子同盟于斷道注己未亦

閏月之日斷道晉地音義

斷徒短反一音短

疏

注釋曰十年夏四月丙辰日有

食之己巳葬侯元卒范以為丙辰晦之日也己巳在晦日之下五月之上常是閏月可知此文與彼正同明亦

閏月之  
日也

傳同者有同也同外楚也疏

釋曰不於清丘發傳者清丘魯不會故重舉所

以色  
之也

秋公至自會

冬十有一月壬午公弟叔肸卒

傳其曰公弟叔肸賢之也其賢之何也宣弑而非之

也注宣公殺子赤叔肸非責之音義

肸許反

非之則胡

為不去也曰兄弟也何去而之注言無所至與之財



則曰我足矣注宣公與之財物則言自足以距之織

屨而食注織屨賣以易食音義

屨九具反

終身不食宣公

之食君子以是為通恩也以取貴乎春秋注泰曰宣

公弑逆故其祿不可受兄弟無絕道故雖非而不去

論情可以明親親言義足以厲不軌書曰公弟不亦

宜乎疏

釋曰衛侯之弟鮒去君傳云合於春秋此不去君傳亦取貴於春秋者易稱君子之道或

出或處或默或語鮒以衛侯惡而難親恐罪及已故棄之而去使君無殺臣之惡兄無害弟之愆故得合於春秋此叔肝以君有大逆不可受其祿食又是孔懷之親不忍奮飛使君臣之節兩通兄弟之情俱暢

故亦取責於春秋叔肝書字鯀直稱名者叔肝內可  
以明親親外足以厲不軌比鯀也賢乎達矣故責之  
稱字鯀雖合於春秋無大  
善可應故直書名而已

十有八年春晉侯衛世子臧伐齊音義

臧子  
郎反

公伐杞

夏四月

秋七月邾人戕繒子于繒音義

戕在良反殘也賊也猶  
殺也繒本或作鄆在陵

反

傳戕猶殘也稅殺也注稅謂捶打殘賊而殺地于繒

惡其臣子不能距難音義

說他活反又徒枯反撫打也字林云木杖或作撲普

木反撫草蒙反打音頂

疏

注釋曰據楚子虔誘蔡侯般殺之于申不于國都也

惡烏路反難乃旦反

甲戌楚子呂卒注商臣子莊王音義

呂左氏作旅

傳夷狄不卒卒少進也卒而不日日少進也日而不

言正不正簡之也注中國君日卒正也不日不正也

今進夷狄直舉其日而不論正之與不正疏

釋曰夷狄不卒

據自此以前吳楚君卒而不書日據襄十二年秋九月吳子乘卒言之也簡之也者中國卒則日不正乃不日夷狄進之則日不論正與不正故云簡之也

公孫歸父如晉

冬十月壬戌公薨于路寢

傳正寢也疏

釋曰重發傳者莊據始故發之宣公墓  
賦有嬖成公承所嬖之下故各發傳也

歸父還自晉至櫟遂奔齊音義

櫟丑貞反  
左氏作笙

傳還者事未畢也注莊八年秋師還是也疏

釋曰執  
則致歸

父非執而需其還者為出奔張本也直名不氏者凡  
致者由上致之故例今不書歸父之氏明有致命之

義也自晉事畢也與人之子守其父之殯注人之子謂

歸父子也言成公與歸父子共守宣公殯捐殯而奔

其父之使者是以奔父也注捐棄也奔猶逐也言成

公棄父之殯逐父之使使謂歸父也父命未反而已

逐之是與親奔父無異音義

捐以全反使所吏反注同

至檉遂奔

齊遂繼事也注杜預曰檉魯竟外故言出音義

竟音坑

春秋穀梁注疏卷十二

春秋穀梁傳注疏卷十二考證

齊人取濟西田傳疏哀公犯齊陵邾而反喪邑易辭之也○臣召南按易辭之也不成句似當作亦易辭也凡經書取皆是易辭此宣公以田賂齊及哀公之犯齊陵邾喪邑經皆書齊人取是皆易辭也

宋華元帥師及鄭公子歸生帥師戰于大棘宋師敗績獲宋華元傳獲者不與之辭也○臣浩按為敵所禽

曰獲穀梁以為不與之辭則迂矣經所書獲尚多韓

之戰秦獲晉侯鄆之戰公子友獲莒棼雞父之戰吳  
獲陳夏留艾陵之戰吳獲齊國書豈皆不與之辭乎  
晉趙盾弑其君夷臯傳出亡至于郊注易曰繼用薇經  
寘于叢棘○易作係用薇經此作繼用楊疏已言之  
監本訛寘于作示于今依原文改正

又疏嚴法峻整○監本脫嚴字今依王弼注原文添  
齊高固來逆子叔姬傳疏徐邈云傳言吾子是宣公女  
也禮亦通爾○推尋文義吾子吾字衍文禮當作理

晉趙盾衛孫免侵陳傳其不言帥師何也不正其敗前

事故不與帥師也○

臣召南

按經書侵伐並不以言

帥師不言帥師為褒貶傳例明曰將卑師衆曰師將  
尊師少直言將然則元年盾救陳書帥師統師衆也  
此年不書帥師統師少也陳初附晉故救之陳後即  
楚故侵之何有於敗前事乎傳乃自破例以言帥師  
為褒則無佞入極羣會伐鄭皆書帥師亦聖經所褒  
乎



公子遂如齊至黃乃復傳復者事畢也○劉敞曰遂受命而行辭病而反此春秋所惡也乃加事畢之文為之文過何以訓事君按經明書至黃則使事未畢顯然

卒已有事于太廟仲遂卒于垂傳此公子也其曰仲何也疏之也○臣召南按此與公羊同義但仲遂生而

賜氏與季友同冠氏于名之上已是貴稱矣况連接如齊至黃乃復之下既稱公子此自不容復出也遂

為弑君逆賊王法所當誅自可援輦不書卒之例若  
以此書仲遂為敗為疏則非經意也

宋師伐滕疏知非為宋師伐滕歸父如齊者○監本脫  
者字今添

夏六月乙卯晉荀林父帥師及楚子戰于邲晉師敗績  
傳曰其事敗也○臣召南按舊解此戰書日者為敗

之故也特於此發傳者二國兵衆不同小國之戰故  
特發之春秋於戰不論大小內外無不書日不獨此

戰書乙卯也如以為兩大國交爭不同小國則莊二十八年衛及齊戰衛師敗績一小一大亦書甲寅僖二十二年宋楚戰泓一小一大亦書己巳又如宋鄭之戰大棘則兩國皆小矣經書壬子何耶且書戰固有不書敗者為內諱敗自可不計至若秦戰令狐經書戊子戰河曲經書戊午又何嘗因書敗績而後書日乎疏又云今以為語辭是也傳文曰字後人作日字如公子啓曰誤作公子啓日亦是其證實則皆曰

字也

十有四年秋九月楚子圍宋疏徐邈云圍例時此圍久  
故書月以惡之也○臣浩按徐意以十五年夏五月

經書宋及楚平其圍自秋迄夏凡九閱月而始解故  
曰最久

六月癸卯晉師滅赤狄潞氏以潞子嬰兒歸傳其曰潞  
子嬰兒賢也○臣召南按各本俱作日字以上下文  
及疏推之曰字自是日字之訛日指癸卯也潞子例

不應書日而書日則知其賢作日字誤也

初稅畝傳古者什一注又受田一十畝以為公田○監本作五十畝別本作十五畝並誤今改正

傳井竈蔥韭盡取焉疏凡為田一頃一十二畝半也○

監本說二十二畝半今改正

春王正月晉人滅赤狄甲氏及留吁注賢嬰兒故滅其

餘邑猶月○

臣召南

按穀梁以嬰兒之歸書日為賢

已屬附會范氏此注尤附會之甚者也經通例春王

正月雖無事亦書甲氏留吁之事適值其下耳



春秋穀梁傳注疏卷十二考證



覆校官編修臣蕭際韶

校對官檢討臣王鍾健

膳錄舉人臣李敬敏